



ZAPISNIK

sa Konstituirajuće sjednice Nezavisnog odbora, održane **26.02.2018.** godine sa početkom rada u 16.30 sati.

Prisutni članovi: Samir Čorbo, Mirela Alihodžić, Sanela Brković, Admir Katica, Miroslav Kružik, Branimir Orašanin i Jusuf Zornić

Ispred OHR-a sjednici je prisustvovali: Dijana Šatara i Senad Zlatar.

Dnevni red

-Usvajanje zapisnika sa 51. sjednice Nezavisnog odbora

1. Izbor Predsjedavajuće/g i zamjenika Predsjedavajuće/g Nezavisnog odbora;
2. Usvajanje Prijedloga godišnje ocjene rada Policijskog komesara;
3. Razno.

Predloženi dnevni red je jednoglasno usvojen.

Zapisnik sa 51. sjednice Nezavisnog odbora iz predhodnog saziva je usvojen uz suzdržanost novog člana Jusufa Zornića koji je suzdržanost obrazložio činjenicom da je tek imenovan za člana Nezavisnog odbora te da se radi o zapisniku i sjednici koja je održana u periodu kada isti nije bio član istog.

AD-1

Predloženo je da u narednom 6-to mjesečnom periodu sjednicama predsjedava Samir Čorbo a njegova zamjenica će biti Mirela Alihodžić, što su članovi Odbora jednoglasno podržali.

AD-2

U okviru ove tačke gđa Alihodžić je predložila godišnju ocjenu o radu Policijskog komesara za 2017. godinu. U okviru rasprave naglašeno je da se usporeno odvija činovanje policijskih službenika prevashodno viših policijskih službenika te da je u ovom dijelu još uvijek nejasna cijela situacija. Od strane članova Nezavisnog odbora, Samira Čorbe i Miroslava Kružika je naglašeno da su prema informacijama sa kojima oni raspolažu, a u vezi sa činovanjem policijskih službenika, pokrenuti određeni postupci po žalbama te da do činovanja u čin višeg inspektora i inspektora uopće nije ni došlo. Obzirom na naprijed navedeno, a posebno činjenicu da Nezavisni odbor ne raspolaže sa informacijom o



trenutnom stanju u pogledu činovanja policijskih službenika, jednoglasno je usvojen zaključak da se iz teksta prijedloga ocjene rada Policijskog komesara za 2017. godinu izbaci dio koji se odnosi na navedeno. Također, Nezavisni odbor je donio zaključak da se od Policijskog komesara na narednoj sjednici zatraži inoformacija o činovanju policijskih službenika, pokrenutim postupcima po žalbama, te ukoliko bude potrebe zatraži i pismeno očitovanje istog.

Na osnovu naprijed navedenog, usvojen je Prijedlog godišnje ocjene rada Policijskog komesara za 2017. godinu uz suzdržanost člana Odbora Jusufa Zornića iz razloga navedenih u gornjem dijelu Zapisnika.

AD-3

Predsjedavajući Nezavisnog odbora G-din Čorbo je istakao da ponovno treba razmotriti prijedlog o povećanju naknada članovima Nezavisnog odbora te je predložio da on i član Odbora Admir Katica, za sljedeću sjednicu, pripreme prijedlog zahtjeva za povećanje naknade.

Članovi Nezavisnog odbora jednoglasno su usvojili zaključak da svi članovi Nezavisnog odbora pripreme za sljedeću sjednicu svoje primjedbe i sugestije vezane za izmjene i dopune Poslovnika o radu Nezavisnog odbora, budući da je postojeći pokazao određene nedorečenosti i manjkavosti u primjeni.

Na kraju sjednice, dogovoreno je da se naredna sjednica Nezavisnog odbora održi 15. marta u standardnom terminu.

Sjednica je završena u 17.00 sati.

PREDSJEDNIK

Samir Corbo


ZAPISNIK

sa Prve sjednice Nezavisnog odbora, održane 15.03.2018. godine sa početkom rada u 16.30 sati.

Prisutni članovi: Samir Čorbo, Mirela Alihodžić, Sanela Brković, Admir Katica, Miroslav Kružik, Branimir Orašanin i Jusuf Zornić

Ispred OHR-a sjednici su prisustvovali: Dijana Šatara i Senad Zlatar.

DNEVNI RED

-Usvajanje zapisnika sa Konstituirajuće sjednice Nezavisnog odbora

6. Razmatranje informacije o protestima demobilisanih boraca na području Kantona Sarajevo (Informacija dostavljena e-mailom);
7. Razmatranje informacije o činovanju (Informacija dostavljena e-mailom);
8. Informacija o stanju kriminaliteta, javnog reda i mira i saobraćaja na području Kantona Sarajevo za mjesec januar 2018. godine;
9. Razmatranje izmjena Poslovnika o radu Nezavisnog Odbora;
10. Usvajanje prijedloga zahtjeva za povećanje naknade za rad Nezavisnog odbora;
11. Realizacija zaključaka Nezavisnog odbora;
12. Razno.

Predloženi dnevni red je jednoglasno usvojen.

Zapisnik sa Konstituirajuće sjednice Nezavisnog odbora je jednoglasno usvojen.

AD-1

O ovoj tački uvodno izlaganje podnio je predsjedavajući Nezavisnog odbora, G-din Samir Čorbo. Istakao da protesti demobilisanih boraca i nedozvoljena blokada saobraćajnica od strane istih može eskalirati i dovesti do nesagledivih posljedica. U tom smislu, prvo pitanje koje će se postaviti jeste pitanje uloge Nezavisnog odbora u pogledu nadzora nad radom Policijskog komesara Kantona Sarajevo. Svjedoci smo da se nakon održanih protesta i blokade saobraćajnica, u medijima pojavile izjave pojedinih političara (saopštenja političkih organizacija-stranaka) u kojima se pohvaljuje rad policijskih službenika i Uprave policije što nije upotrebljavala silu, odnosno što nije poduzela zakonom predviđene mjere.

Član Nezavisnog odbora G-din Orašanin je postavio pitanje kako i koliko se policija u smislu struke može oduprijeti uticaju aktuelne politike, odnosno političkih stranaka. Istakao je da nikakav politički uticaj ne bi smio da bude rad na Polcijskog komesara, jer struka treba da ocijeni da li je potrebno i na koji način zabraniti ove proteste. Zanimanje odnosno struka se mora odvojiti od politike. Uticaj politike treba svesti na najmanju moguću mjeru i na prvo mjestu staviti stručnost.

Član Nezavisnog odbora G-đa Sanela Brković, ali i ostali članovi Nezavisnog odbora zauzeli su stav da policija Kantona Sarajevo mora poštovati zakonske i podzakonske akte i postupati po istim. Ista je podsjetila da je u Informaciji koju je Nezavisni odbor dobio od strane Policijskog komesara, a ista se odnosi na na poduzete mjere i radnje od strane Uprave policije u vezi sa protestima demobilisanih boraca na području Kantona Sarajevo, navedeno da je Uprava policije imala saznanja da su predstavnici određenih boračkih udruženja 17.02.2018. godine održali sastanak u Tešnju i da je tada dogovoreno da će se 28.02.2018. godine u jutarnjim satima organizovati da se borci sa područja Žepča, Željeznog polja, Doboj Juga i Tešnja upute u Sarajevo. Prema naprijed navedenom, jasno se znalo da će doći do protesta. Ista smatra da se

svako mora ponašati u skladu sa zakonom i s tim u vezi predlaže da o istom Nezavisni odbor zauzme određeni stav, odnosno usvoji određeni zaključak.

Član Nezavisnog odbora G-din Miroslav Kružik je se osvrnuo na događaje iz 2014. godine gdje je šačica od 50-tak ljudi zapalila Predsjedništvo i Opštinu Centar, odnosno zgradu Kanton Sarajevo. Istakao je da tada niko nije donio odluku (naredio) da se to zaustavi.

Član Nezavisnog odbora G-din Jusuf Zornić je istakao da su policijske strukture podređene aktuelnoj politici što ne bi trebalo da se dešava. Dešava se selektivna primjena zakona. Također, isti je naglasio da ni tada nije postojao operativni plan za slučaj takvih situacija niti je bio formiran operativni štab.

Predsjedavajući Nezavisnog odbora, G-din Samir Čorbo je istakao da je ranije već na jednoj od sjednica postavio pitanje Policijskom komesaru vezano za vanredno aktivnosti, da li Uprava policije ima operativni plan za ove situacije ili ne. Policijski komesar je tada odgovorio da Uprava policije ima operativni plan za vanredne okolnosti. Ključna stvar je da se zakon ne poštuje i da je na djelu selektivna primjena zakona.

Član Nezavisnog odbora G-din Admir Katica je naglasio da u svakom slučaju primat treba staviti na sigurnosnu a ne na političku procjenu, što u svakom slučaju treba da uradi struka.

AD-2

U okviru ove tačke tražiće se od Policijskog komesara detaljniji usmeni izvještaj dokle se došlo u postupku činovanja policijskih službenika.

AD-3

Uvodno izlaganje o ovoj tački dnevnog reda podnio je komesar Halilović. U mjesecu januaru 2018. godine, na području Kantona Sarajevo registrovano je 387 krivičnih djela što je za 75 djela više u odnosu na isti mjesec prethodne godine. Od ukupnog broja registrovanih krivičnih djela, 181 izvršeno je od strane poznatih, a 206 od strane nepoznatih izvršilaca. Za 72 djela od ukupnog broja krivičnih djela prijavljenih po nepoznatom izvršiocu, naknadno je identifikovan osumnjičeni izvršilac, od čega je 38 krivičnih djela iz izvještajnog, a 34 iz ranijeg perioda. Iz naprijed navedenog proizilazi da su službenici Uprave policije MUP-a KS u izvještajnom mjesecu za ukupno 253 krivičnih djela identifikovali osumnjičene izvršioce, što je za 5,1% više u odnosu na isti mjesec prethodne godine.

U mjesecu januaru 2018. godine u odnosu na isti mjesec prethodne, zabilježeno je povećanje broja registrovanih krivičnih djela ili 24%. Povećanje je zabilježeno u oblastima protiv imovine (za 39 djela), zdravlja ljudi (za 21), života i tijela (za 10) i javnog reda i pravnog prometa (za 4).

I dalje su aktuelne krađe motornih vozila. Na području Kantona Sarajevo u mjesecu januaru 2018. godine izvršeno je 26 krivičnih djela teških krađa motornih vozila od čega je pet pronađeno i vraćeno vlasnicima (Uprava policije MUP-a KS - četiri vozila i vlasnici – jedno vozilo). Broj teških krađa motornih vozila u odnosu na uporedni mjesec, povećan je za 11 djela.

Predsjedavajući Nezavisnog odbora, G-din Samir Čorbo postavio je pitanje Policijskom komesaru da Nezavisnom odboru dadne više informacija vezano za proteste demobilisanih boraca na području Kantona Sarajevo. Također, isti je postavio pitanje koje aktivnosti Uprava policije trenutno poduzima vezano za već najavljene nove masovne proteste demobilisanih boraca. Istakao je da je blokiranje saobraćajnica glavnog grada potpuno neprihvatljivo. Naglasio je da vjerovatno u istima ima upliva i politike.

Policijski komesar je u odgovoru na postavljena pitanja istakao da na području Kantona Sarajevo nije bilo najave niti je Uprava policija imala operativna saznanja da će doći do blokade saobraćajnica. FMUP je zatražila pomoć Uprave policije u smislu angažovanja određenih jedinica jer su isti imali informaciju da će se ispred Parlamenta FBiH održati protesti. Dana 28.02.2018. godine Uprava policije je pripremila Jedinicu za specijalnu podršku koja je bila na raspolaganju FMUP-u a istovremeno su i vodovi Uprave policije bili pripravnici. Od strane Direkcije za koordinaciju policijskih tijela BiH Uprava policije je obavještena da je došlo do blokade saobraćajnica na području HNK-a i da jedna grupa autobusa iz Travnik sa demobilisanim borcima dolazi u Sarajevo. Uprava policije je preuzela autobuse sa demobilisanim borcima i isti su smješteni na parking porodilišta jer su već bili krenuli prema Parlamentu FBiH ali su ih policijski službenici skrenuli prema Vogošćanskoj petlji. Također Uprava policije je dobila informaciju da su blokirane i određene saobraćajnice na području ZE-DO i Tuzlanskog Kantona. Jednu jedinicu Uprava policije

je preusmjerila na područje Hadžića, a jedan dio snaga je upućen u Vogošću. Na području Kantona Sarajevo bile su blokade na Ivan sedlu i na području opštine Vogošća. U njima su učestvovali pripadnici boračke populacije iz drugih Kantona, imaju se saznanja da su demobilisani borci došli čak iz USK sa šest autobusa. Blokada saobraćajnica je završena u pola 3 ujutro. Demobilisani borci su tražili da im se dozvoli da autobusi dođu na Vogošćansku petlju ali im to nije dozvoljeno jer bi na taj način skroz bio blokiran saobraćaj. Tražili su da im se dopusti da se vrate autobusima, to im je Uprava policije dozvolila s tim što su autobusi praćeni do područja Pretisa. U 6 i 15 sati normalizovan je saobraćaj na području Kantona Sarajevo.

Predsjedavajući Nezavisnog odbora, G-din Samir Čorbo je postavio pitanje da li su pripadnici policije izdali prekršajne naloge demonstrantima, kao i kakve su aktivnosti Uprave policije u vezi sa eventualnim budućim protestima, da li Uprava policije preventivno djeluje?

Policijski komesar je odgovorio, da po njegovim saznanjima, prekršajni nalozi su izdati na području Tuzlanskog kantona, za one demobilisane borce koji su pružali otpor. Uprava policije Kantona Sarajevo je cjelokupan prikupljeni materijal o održanim protestima dostavila Tužilaštvu Kantona Sarajevo. Sva lica koja su sudjelovala u protestima su popisana i protiv svih lica će biti podnesene prekršajne prijave. Istakao je da su danas (15.03.2018. godine) bili 10-min. protesti i blokada saobraćaja u Alipašinoj ulici od strane radnika Hidrogradnje protiv kojih će biti podnesene prekršajne prijave. Uprava policije, ubuduće, neće dopustiti blokiranje saobraćajnica u Kantonu Sarajevo.

Član Nezavisnog odbora G-din Miroslav Kružik postavio je pitanje Policijskom komesaru da li postoji politički uticaj na rad istog i da li Uprava policije može sama riješiti najavljene proteste i blokade saobraćajnica.

Član Nezavisnog odbora G-din Branimir Orašanić je istakao da je kada su se dešavali protesti i blokade saobraćajnica neki političari izjavili da se sada okrivljuju oni što nisu spriječili proteste i blokade saobraćajnica, a da su spriječili iste opet ne bi valjalo. Smatra da nijednom političaru nije mjesto u policiji. Struka treba da procjeni da li su se protesti mogli spriječiti ili ne.

Odgovarajući na postavljena pitanja Policijski komesar je rekao da je bio pod snažnim političkim pritiscima da se upotrijebi sila samo na području Kantona Sarajevo. U 12:00 sati je lično obišao Vogošćansku petlju a poslije područje Hadžića. U međuvremenu je telefonski kontaktirao sa premijerom Kantona Sarajevo a o svim aktivnostima Uprave policije blagovremeno je obavještavao ministra unutrašnjih poslova Kantona Sarajevo. U 22:00 sati je bio zakazan sastanak sa premijerom Kantona Sarajevo i ministrom unutrašnjih poslova Kantona Sarajevo. U 21:30 sati isti je obavješten da je zakazan sastanak štaba od strane Premijera FBiH. Na tom sastanku Policijski komesar je bio jedini predstavnik Kantona Sarajevo i na tom sastanku na istog je izvršen strašan politički pritisak, prije svega od Premijera FBiH da se upotrijebi sila, u cilju deblokade vogošćanske petlje, odnosno da se upotrijebi sila u deblokadi Kantona Sarajevo. Na tom sastanku isti je naglasio da on neće upotrijebiti silu sam, odnosno da on neće da bude prvi koji će upotrijebiti silu na području Kantona Sarajevo, u odnosu na Kantone na čijim područjima je došlo do protesta odnosno blokade saobraćajnica. Premijer FBiH je na tom sastanku istakao da se u 5:00 sati treba krenuti u deblokadu saobraćajnica i da je kontaktirao sa Policijskim komesarom ZE-DO Kantona, Policijskog komesara Tuzlanskog kantona nije niko obavijestio (valjda zbog trenutnih političkih dešavanja u tom Kantonu), a Policijskog komesara HNK-a je trebao obavijestiti Policijski komesar Kantona Sarajevo. Komesar je istakao da je tada naglasio da Uprava policije Kantona Sarajevo nije spremna krenuti u deblokadu u 5:00 sati zbog potrebe da se organizuju sve raspoložive jedinice i da će iste u 7:00 sati biti spremne za planirane aktivnosti. Ovakve informacije se nisu svidjele premijeru FBiH na šta sam ja isti naglasio da Policijski komesar Kantona Sarajevo za svoj rad odgovara Kantonalnoj vladi i ministru unutrašnjih poslova. Također je istakao da će policijski službenici u 6:00 sati biti na zbornom mjestu ali za poduzimanje bilo kakvih aktivnosti mora se imati plan. Za aktivnosti deblokiranja saobraćajnice potrebne su svježe snage, Uprava policije nema toliko adekvatne opreme, ljudi također nisu uvježbani niti spremni za takve aktivnosti. Nakon što su demobilisani borci sami zatražili da autobusima napuste područje Kantona Sarajevo, telefonski je kontaktirao Policijskog komesara ZE-DO Kantona te ga obavijestio da je Uprava policije Kantona Sarajevo pregovorima uspjela da deblokira saobraćajnice te je isti naglasio da će oni pokušati isto. Naglašava da je koordinacija FMUP-a bila jako loša. Sjednica Vlade Kantona Sarajevo je bila zakazna za 7:15 sati u cilju pronalaženja adekvatnog rješenja jer se na ulicama ne mogu rješavati stvari. Također je istakao da ulaže sve napore da policija bude izvan domašaja aktuelne politike.

Predsjedavajući Nezavisnog odbora, G-din Samir Čorbo je postavio pitanje Policijskom komesaru, kakva je saradnja Uprave policije sa OSO-m?

Policijski komesar je naglasio da je saradnja sa OSO-m jako dobra, da su od strane iste dobili jako značajne obavještajne podatke u pogledu organizacije protesta jer navedeni protesti nisu bili organizovani na području Kantona Sarajevo. Također, policijski komesar je naglasio da niko na njega ne može uticati niti će podleći bilo kakvim pritiscima. FMUP je trebao preuzeti koordinaciju i saslušati struku. Svaku situaciju je potrebno snimiti, odgovoriti na pitanje, šta, kako, gdje, na koji način, mora se imati neki operativni plan. Poruka Vlade Kantona Sarajevo je sasvim jasna, ne mogu se blokirati saobraćajnice u Kantonu Sarajevo, podnosićemo prekršajne prijave i kada je to neophodno upotrijebićemo silu. Obzirom da je izborna godina većina političkih stranaka dopušta protestovanje i blokadu saobraćaja koja nije najavljena. Isti naglašava da Vlada Kantona Sarajevo upotpunosti stoji iza Uprave policije. Samo kada Uprava policije dobije rješenje/odobrenje nadležnog organa za obustavu saobraćaja, Uprava policije će to dopustiti i postupiti u skladu sa donesenim rješenjem.

Član Nezavisnog odbora G-din Admir Katica je postavio pitanje Policijskom komesaru da li je imao sastanak sa Policijskim komesarima sa područja drugih Kantona. Isti je naglasio da je na poziciji Policijskog komesara, tražio bi sastanak sa FMUP-om te tražio procjenu sigurnosne situacije. Isti je naglasio da po njemu nije u redu da se od strane policijskih službenika jednog Kantona obezbjeđuju autobusi sa područja drugih Kantona do područja Kantona Sarajevo. Smatra da su se trebala izvući određena iskustva iz 2014. godine.

Policijski komesar je odgovorio da je imao ranije jedan sastanak sa Policijskim komesarima drugih Kantona ali o protestima i blokadi saobraćajnica nije bilo sastanka. Nakon ovog odgovora, Policijski komesar je detaljnije izložio postupak činovanja u Upravi policije istakavši da je jučer (14.03.2018. godine) potpisao 6 rješenja za glavne inspektore. U tom postupku je bila jedna žalba. Također, donesena su rješenja za samostalne inspektore gdje su tri policijska službenika raspoređena na navedene pozicije (trebalo ih je 12), donesena je odluka o raspisivanju internog oglasa za čin viši inspektor i u tom smislu će se krenuti u ubranu proceduru. Komisija koja formirana za provođenje procedure unapređenja u čin inspektora, završni intervjui su u toku. Za poziciju starijeg narednika završena su dva ciklusa, u činu narednika su 103 radna mjesta a mlađih inspektora će biti 116. Konkurs za prijem u čin policijac je završen, čak je Vlada Kantona Sarajevo dala prijedlog da se primi svih 150 kandidata koji su uspješno prošli konkursnu proceduru. Pravni Sektor Uprave policije je dao svoje mišljenje da to nije pravno-formalno moguće, dok je ministar pravde Kantona Sarajevo dao mišljenje da je to moguće i da se u tom slučaju mijenja samo broj.

Predsjedavajući Nezavisnog odbora, G-din Samir Čorbo je postavio pitanje Policijskom komesaru da li Uprava policije ima saznanja koliko sirijskih izbjeglica se nalazi na području Kantona Sarajevo.

Policijski komesar je odgovorio da se izbjeglice smještaju u azilantske centre. Nadležnost u toj situaciji ima Služba za poslove sa strancima a kod Uprave policije se oni samo evidentiraju. Nažalost, niko ne vrši sigurnosnu provjeru tih lica.

Na kraju sjednice, Nezavisni odbor jednoglasno je donio sljedeći

ZAKLJUČAK

Nezavisni odbor Skupštine Kantona Sarajevo na sjednici održanoj dana 15.03.2018.godine razmatrao je Informaciju policijskog komesara koja se odnosi na poduzete mjere i radnje od strane Uprave policije u vezi sa protestima demobilisanih boraca na području Kantona Sarajevo, u period od 28.02.2018.godine-01.03.2018.godine, te planske aktivnosti Uprave policije za slučaj eventualnih ponovnih blokada saobraćajnica, te daje punu podršku policijskom komesaru MUP-a Kantona Sarajevo i Upravi policije u opredjeljenju da će ubuduće sankcionisati, spriječiti i onemogućiti eventualne blokade saobraćajnica u Kantonu Sarajevo u skladu sa zakonom. Nezavisni odbor Skupštine Kantona Sarajevo ne ulazeći u opravdanost ili neopravdanost zahtjeva određenih populacija, smatra da je apsolutno nedopustivo da se na ovakav nezakonit način ograničavaju ustavna prava svih ostalih građana Kantona Sarajevo. Nezavisni odbor Skupštine Kantona Sarajevo smatra da policijski Komesar i Uprava policije MUP Kantona Sarajevo treba u svim situacijama postupati isključivo u skladu sa zakonom i pravilima policijske struke.

AD-4

U okviru ove tačke dogovoreno je da članovi Odbora pripreme svoje prijedloge za izmjenu Poslovnika o radu Nezavisnog odbora o kojima bi se razgovaralo na nekoj od narednih sjednica.

AD-5

Draft prijedloga zahtjeva o povećanju naknade dostavio je prisutnim predsjedavajući Nezavisnog odbora G-din Samir Čorbo. Obzirom da je član Nezavisnog odbora Mirela Alihodžić imala određenih izmjena u zahtjevu, dogovoreno je da ista dostavi ostalim članovima Nezavisnog odbora svoje izmjene, te da se konačni zahtjev uputi Komisiji za izbor i imenovanja i administrativna pitanja.

AD-6

O ovoj tački nije bilo rasprave.

Sjednica je završena u 18.15 sati.

Dogovoreno je da naredna sjednica se održi 17.04.2018. godine s početkom u 16.30 sati.

PREDSJEDNIK

Samir Čorbo



ZAPISNIK

sa Druge sjednice Nezavisnog odbora, održane 23.04.2018. godine sa početkom rada u 17.00 sati.

Prisutni članovi: Samir Čorbo, Mirela Alihodžić, Sanela Brković, Admir Katica, Miroslav Kružik, Branimir Orašanić i Jusuf Zornić

Ispred OHR-a sjednici su prisustvovali: Dijana Šatara i Senad Zlatar.

DNEVNI RED

-Usvajanje zapisnika sa Prve sjednice Nezavisnog odbora

5. Informacija o stanju kriminaliteta, javnog reda i mira i saobraćaja na području Kantona Sarajevo za mjesec februar 2018. godine;
6. Informacija o stanju kriminaliteta, javnog reda i mira i saobraćaja na području Kantona Sarajevo za mjesec mart 2018. godine;
7. Informacija o stanju kriminaliteta, javnog reda i mira i saobraćaja na području Kantona Sarajevo za period januar-mart 2018. godine;
8. Izvještaj o radu Policijskog komesara za period januar-mart 2018. godine;
9. Realizacija zaključaka Nezavisnog odbora;
10. Razno.

Predloženi dnevni red je jednoglasno usvojen.

Zapisnik sa Prve sjednice Nezavisnog odbora je jednoglasno usvojen.

Članovi Nezavisnog odbora su jednoglasno donijeli zaključak da se o tačkama AD-1, AD-2, AD3 i AD-4 vodi jedinstvena rasprava.

AD-1, AD-2, AD-3 i AD-4

O ovim tačkama uvodno izlaganje podnio je Policijski komesar Halilović. Pripadnici Uprave policije su tokom perioda januar-mart 2018. godine u skladu sa zakonom izvršavali poslove i zadatke iz svoje nadležnosti, a koji su se prvenstveno ogledali u zaštiti lične i imovinske sigurnosti građana. Aktivnosti su bile usmjerene na sprečavanje i rasvjetljavanje počinjenih krivičnih djela i identifikaciji izvršilaca, opserviranje područja na kojima je došlo do izvršenja većeg broj krivičnih djela, sprečavanje narušavanja javnog reda i mira, sprečavanje najtežih oblika prekršaja, kontrolisanje stanja sigurnosti saobraćaja, osiguranju javnih okupljanja i objekata od posebnog interesa, pružanju pomoći drugim organizacijama, te izvršavanju poslova i zadataka koje je trenutna situacija nametala kao prioritete i vanredne.

Kriminalitet na području Kantona Sarajevo u periodu januar – mart 2018. godine u odnosu na isti period prethodne godine, karakteriše povećanje broja registrovanih krivičnih djela za 7,7%, prijavljenih lica za 31,4%, povratnika u činjenju krivičnih djela za 10,6%, maloljetnih izvršilaca za 61,5% i lica lišenih slobode za 32,9%. Ovo povećanje osnovnih

statističkih pokazatelja jeste rezultat proaktivnog djelovanja Uprave policije, odnosno pojačanih i planski provedenih aktivnosti policije, naročito u oblastima protiv zdravlja ljudi, odnosno djela vezanih za zloupotrebe opojnih droga kao i krivičnih djela organizovanog kriminala u vezi sa privrednim kriminalitetom, što je direktno rezultiralo povećanjem broja prijavljenih krivičnih djela, procesuiranih i lica lišenih slobode.

U periodu januar – mart 2018. godine, registrovano je 1.139 krivičnih djela, što je za 81-no djelo ili više nego u periodu januar – mart 2017.godine.

U 532 slučaja, krivična djela su izvršena od strane poznatih izvršilaca i izvršilaca zatečenih u činjenju krivičnog djela, a 607 krivičnih djela prijavljeno je po nepoznatom izvršiocu, od kojih su 224 naknadno rasvijetljena.

Najveći broj krivičnih djela su djela protiv imovine i to: 711 krivičnih djela što je za 17 više u odnosu na uporedni period.

Osnovni razlog za navedeno povećanje broja krivičnih djela u odnosu na uporedni period prošle godine, jeste činjenica da su se u navedenom vremenskom periodu prošle godine vodile dvije akcije (radilo se o krađi motornih vozila) pod nadzorom državnog tužilaštva.

Najbrojnija djela iz ove oblasti su: teška krađa, krađa, razbojništvo, oštećenje tuđe stvari itd.

U prva tri mjeseca ove godine na području Kantona Sarajevo izvršeno je 86 krivičnih djela teških krađa motornih vozila, od čega je 17 vraćeno.

Predsjedavajući Nezavisnog odbora, G-din Samir Čorbo istakao je veliki problem prosjačenja u Kantonu Sarajevo te postavio pitanje Policijskom komesaru da li postoji bilo kakav operativni plan u cilju suzbijanja navedene pojave, odnosno da li bi se ista mogla podvesti pod krivično djelo a ne prekršaj.

Policijski komesar Halilović je govoreći o problemu prosjačenja u Kantonu Sarajevu istakao da su postojale određene aktivnosti i to jedna sa OSCE-om i dvije sa Tužilaštvom Kantona Sarajevo kako bi se bar ublažio ovaj problem. Istakao je da najveći broj lica koja prose na ulicama Kantona Sarajevo dolaze iz ZE-DO Kantona kao i iz Kaknja prije svega jutarnjim vozom gdje se na željezničkoj stanici "raspršavaju" po cijelom Kantonu. Kod ovih osoba veliki problem zadaje nedostatak ličnih dokumenata te pojedinci već imaju neplaćene kazne kazne u iznosima od 20.000 KM-30.000 KM. Centar za socijalni rad kome je to osnovna djelatnost samo registruje prestupnike, mada ni jedan drugi državni organ koji u opisu svojih poslova ima i djelatnosti suzbijanja prosjačenja ne ispunjava svoju zakonsku obavezu. Sutra će se održati kolegij na kojem će se pokušati iznaći rješenje za navedeni problem, odnosno na koji način će policijski službenici postupati ubudućnosti kada se radi o prosjačenju. Policijski komesar Halilović je istakao da nema sistemskog rješenja, mada će pokušati nešto promijeniti na način da policijski službenici u civilnim odjelima pokušaju razgovarati sa licima koja prose. Naglasio je da često rješavanje situacije zavisi i od pristupa policijskog službenika, jer na neki način postoji i tiha opstrukcija od strane policijskih službenika jer ne žele da se bave navedenom problematikom.

Predsjedavajući Nezavisnog odbora, G-din Samir Čorbo postavio je pitanje da li postoji mogućnost da formira tim ljudi koji će se baviti samo problematikom prosjačenja.

Policijski komesar Halilović je odgovorio da policijske uprave trebaju napraviti planove kojim će se definisati na koji način će se rješavati navedena problematika, a na kraju izvještajnog perioda imaćemo izvještaje i rezultate.

Član Nezavisnog odbora G-din Branimir Orašanin je postavio pitanje Policijskom komesaru u vezi sa lažnim postavljanjem eksplozivnih sredstava u školama na području Kantona Sarajevo u smislu kakvi su rezultati postignuti u vezi sa otkrivanjem „dojavljivača“ postavljanja navedenih sredstava.

Policijski komesar je istakao da je najveći broj "dojavljivača" otkriven i protiv njih se vodi postupak. Istakao je da se u saradnji sa mobilnim operaterima dolazi do brojeva telefonskih kartica sa kojih se upućuju pozivi i da se na taj način otkrivaju „dojavljivači“. U tom smislu naglasio je da Uprava policije ima veoma dobru saradnju sa BH Telekomom u vezi ovoga problema, kao i obavještajnom službom, dok se rezultati M-Tel-a i Eronet-a čekaju mjesecima. Također, Policijski komesar je dodao da je održan sastanak sa Vijećem roditelja kao i nadležnim obrazovnim institucijama u vezi sa navedenom problematikom.

Član Nezavisnog odbora G-din Branimir Orašanin je postavio pitanje Policijskom komesaru u vezi sa rješavanjem smještajnog prostora Uprave policije, da li se nešto promijenilo na tom planu.

Policijski komesar je istakao da ga je ministar informisao da su u toku pregovori sa Vodovodom, u dijelu ispod Energoinvesta gdje bi se trebala graditi zgrada Uprave policije ali da premijer i Kantonalni praobranioč trebaju da iznađu načina da se postigne dogovor sa Vodovodom u pogledu njihovog zahtjeva za refundiranjem određenog iznosa za to područje na kojem bi se gradila zgrada Uprave policije.

Na pitanje član Nezavisnog odbora G-dina Branimira Orašanina, da li je gradonačelnik održao ranije dato obećanje i donirao sredstva za nabavku dva vozila za potrebe Uprave policije radi kontrolisanja i osiguranja trebevičke žičare, Policijski komesar je odgovorio da je već jedno vozilo nabavljeno a da je nabavka drugog vozila u toku.

Policijski komesar je dodao da je završen prijem 120 policijskih službenika i da se isti nalaze na obuci na Vracama, a na pitanje zamjenice predsjedavajućeg Nezavisnog odbora G-đe Mirele Alihodžić da li ima nekih drugih problema ili izazova u radu, Policijski komesar je odgovorio da mu je trenutno problem primjena Zakona o PIO, na način da postoje dva tumačenja u vezi sa računanjem radnog staža. Jedno tumačenje nadležnog Ministarstva prema kojem se u staž računa samo ono što je plaćeno a drugo tumačenje Zavoda da je poslodavac dužan uplatiti staž godinu za godinom s tim što je ratni staž odvojen i on se računa duplo ukoliko ga zaposlenik želi koristiti. Istakao je svoju bojazan da ne želi da ga neko neopravdano optužuje da nekoga želi ili ne želi penzionisati, te je s tim u vezi zatražio od pomoćnika za pravne poslove da da svoje mišljenje u vezi sa navedenom problematikom.

Član Nezavisnog odbora G-din Miroslav Kružik istakao je problem šumskih krađa na rubnim djelovima Kantona Sarajevo gdje se krčmi državna šuma i sav taj novac odlazi u džepove privatnika.

Član Nezavisnog odbora G-din Jusuf Zornić je naglasio da su izvještajima Uprave policije koji se dostavljaju Nezavisnom odboru u nekim djelovima netačni. Razlog za to jeste što se u istima navodi procenat rasvjetljenosti počinjenih krivičnih djela. Međutim, ako se uđe u srž problematike vidi se da to nije stvarno stanje, obzirom da se u praksi dešava da ima puno odbačaja izvještaja o počinjenim krivičnim djelima, od strane Tužilaštva pa i suda. Smatra da je realna otkrivenost krivičnih djela u prosjeku oko 22% dok je u izvještajima koji se dostavljaju Nezavisnom odboru taj procenat preko 60%.

Sa ovom konstatacijom se složio i Policijski komesar smatrajući da se neće moći uraditi potpuno tačna metodologija izrade izvještaja.

Na kraju sjednice, Nezavisni odbor donio je zaključak da se do sljedeće sjednice pripremi detaljan tromjesečni izvještaj o radu Policijskog komesara. Za pripremu istog zadužen je član Nezavisnog odbora G-din Jusuf Zornić.

AD-5

O ovoj tački nije bilo rasprave.

AD-6

O ovoj tački nije bilo rasprave.

Sjednica je završena u 18:28 sati.

Dogovoreno je da naredna sjednica se održi 22.05.2018. godine s početkom u 16.30 sati.

PREDSJEDNIK

Samir Čorbo



ZAPISNIK

sa Treće sjednice Nezavisnog odbora, održane 22.05.2018. godine sa početkom rada u 16.30 sati.

Prisutni članovi: Samir Čorbo, Mirela Alihodžić, Sanela Brković, Admir Katica, Miroslav Kružik, Branimir Orašanić i Jusuf Zornić

Ispred OHR-a sjednici je prisustvovala: Dijana Šatara.
Sjednici je od 17.00 sati prisustvovao i policijski komesar Mevludin Halilović.

DNEVNI RED

-Usvajanje zapisnika sa Druge sjednice Nezavisnog odbora

1. Informacija o stanju kriminaliteta, javnog reda i mira i saobraćaja na području Kantona Sarajevo za mjesec april 2018. godine;
2. Prijedlog Izvještaja o radu Policijskog komesara za period januar-mart 2018. godine;
3. Realizacija zaključaka Nezavisnog odbora;
4. Razno.

Predloženi dnevni red je jednoglasno usvojen.

Zapisnik sa Druge sjednice Nezavisnog odbora je jednoglasno usvojen.

Do dolaska Policijskog komesara članovi Odbora su razmatrali ostale tačke dnevnog reda.

AD-2

Članovi Nezavisnog odbora su jednoglasno prihvatili Izvještaj o radu Policijskog komesara za period januar-mart 2018. godine uz pisane primjedbe gđe Mirele Alihodžić, te se ovaj materijal upućuje Skupštini Kantona Sarajevo.

AD-3

U periodu između sjednica nije bilo realiziranih zaključaka Nezavisnog odbora.

AD-4

U okviru ove tačke je dogovoreno da se naredna sjednica održi 12. juna, julska okvirno oko 24. jula, a avgustovska 28. avgusta.

AD-1

O ovoj tački dnevnog reda uvodno izlaganje podnio je Policijski komesar Halilović.

U mjesecu aprilu 2018. godine, na području Kantona Sarajevo registrovano je 361-no krivično djelo što je za 24 djela više u odnosu na isti mjesec prethodne godine. Od

ukupnog broja registrovanih krivičnih djela, 182 izvršeno je od strane poznatih, a 179 od strane nepoznatih izvršilaca. Za 48 djela od ukupnog broja krivičnih djela prijavljenih po nepoznatom izvršiocu, naknadno je identifikovan osumnjičeni izvršilac, od čega je 31-no krivičnih djela iz izvještajnog, a 17 iz ranijeg perioda. Iz naprijed navedenog proizilazi da su službenici Uprave policije MUP-a Kantona Sarajevo u izvještajnom mjesecu za ukupno 230 krivičnih djela ili 63,7% identifikovali osumnjičene izvršioce, što je za 1,4% više u odnosu na isti mjesec prethodne godine. Na području Kantona Sarajevo u mjesecu aprilu ove godine izvršeno je 19 krivičnih djela teških krađa motornih vozila od čega je šest pronađeno i vraćeno vlasnicima .

Tokom mjeseca aprila 2018. godine, u odnosu na isti mjesec prošle godine, na području Kantona Sarajevo registrovano je smanjenje ukupnog broja saobraćajnih nezgoda i nezgoda sa materijalnom štetom, dok je povećan broj nezgoda sa nastradalim licima i broj nastradalih lica. Registrovane su 764 saobraćajne nezgode, 695 sa materijalnom štetom i 69 sa nastradalim licima .

Komesar Halilović se osvrnuo na učestale napade vatrenim oružjem na policijske službenike te je istakao da su u 2016. godini bila dva, u 2017. godini tri i u 2018. godini (do danas) već tri napada na policijske službenike. Istakao je da je jedan policijski službenik koji je povrijeđen prilikom sprečavanja krađe motornog vozila na Dobrinji zadržan u bolnici na liječenju. Istog je posjetio tokom jučerašnjeg dana zajedno sa ministrom unutrašnjih poslova Kantona Sarajevo i premijerom Kantona Sarajevo. Policijski komesar je naglasio da u krađi motornih vozila počinioci ne prezaju ni od čega.

Član Nezavisnog odbora, G-din Čorbo se osvrnuo na činovanje policajaca a prije svega na činovanje policajaca Konakovića i Dupovca koji su učestvovali u pojedinim aktivnostima vezanim za predmet "Dženan Memić", a koje su i od strane ad hoc tijela Skupštine KS (koji je proveo skupštinski nadzor nad radom policije u ovom predmetu) označene kao takve da predstavljaju neodgovorno postupanje policijskih službenika i disciplinski postupak koji je iniciran protiv navedenih je obustavljen isključivo i samo zbog zastare.

Odgovarajući na pitanje činovanja navedenih policijskih službenika, Komesar je istakao da se protiv ove dvojice policajaca nije vodio disciplinski postupak tako da oni kao i svi drugi policajci su ostvarili pravo na činovanje.

Na pitanje gđina Katice da li ovo činovanje predstavlja napredovanje u službi, policijski komesar je odgovorio potvrdno. Gđin Katica je istakao da smatra potpuno neprihvatljivim ovakvo postupanje te da se na ovaj način šalje loša poruka kako policajcima koji su unaprijeđeni (jer i dalje mogu raditi na niskom nivou profesionalnosti a biti unaprijeđeni) tako i drugim policajcima u MUP-u KS koji na ovaj način dobijaju poruku da se profesionalizam i zalaganje ne isplati i nije garant napretka u karijeri.

Komesar se osvrnuo na nedavne događaje oko izmještanja migranata u prihvatni centar Salakovac i nemilih scena na prevoju Ivan-sedlo, gdje je specijalna policija HNK zabranila ulazak istih i autobuse s migrantima vratila na područje Kantona Sarajevo. Policijski komesar je naglasio da od 2017. godine načelnik policijske uprave Trnovo ima problem sa migrantima gdje je u vezi sa navedenom problematikom ostvarena komunikacija sa direktorom migracionog centra. Iako Uprava policije Kantona Sarajevo nema nadležnost kada su u pitanju migranti, kada je uspostavljeno šatorsko naselje preko puta Vijećnice, odnosno na poziv građana Uprava policije je reagovala i o događajima obavještavala Službu za poslove sa strancima. One migrante koji nisu imali registracioni broj predavali su Službi za poslove sa strancima. Ranije Služba za poslove sa strancima nije imala noćne smjene tako da su migranti sami dolazili i prijavljivali se u Upravu policije,

a nakon što bi kontaktirali Službu za poslove sa strancima isti su odgovarali da se isti zadrže do jutra i da ih se onda pusti. Prvi sastanak vezan za migrantsku krizu održan je 25.04.2018. godine sa nadležnim institucijama kako bi se došlo do uputa za postupanje odnosno smjernica koje na tom sastanku Uprava policije nije dobila. Načelnik Općine Stari Grad je također organizovao sastanak u vezi sa navedenom tematikom koji također nije rezultirao nikakvim konkretnim uputama. Nakon toga uslijedio je sastanak u organizaciji IOM-a kojem su prisustvovali i načelnici općina u cilju osiguranja smještaja i hrane za migrante, ali ni na tom sastanku nije ništa riješeno jer nijedan načelnik nije želio migrante na području svoje općine. Sastanak je organizovan i od strane OSA-e gdje su samo razmijenjene informacije i sa tačke gledišta Uprave policije pokazalo se da je Uprava policije u navedenoj situaciji najbolje postupila obzirom da je migrante koji nisu imali registracioni broj dovodila u stanicu i uzimala njihove podatke te je na taj način Uprava policije napravila improviziranu bazu o migrantima koji nisu imali registracioni broj. Uprava policije je aktivno sudjelovala u izmještanju migranata sa područja Kantona Sarajevo i imala je plan za postupanje, migranti su pristali na premještaj i o svemu je bio obavješten dežurni u HNK. Nakon što je obavješten da su migranti zaustavljeni na Ivan-sedlu, Policijski komesar je kontaktirao direktora Službe za poslove sa strancima i poslao još policijskih službenika kako bi bili na raspolaganju. Prema njegovim podacima, policijski komesar HNK je naložio da se migranti vrate jer je o istom zaključak donijela Vlada HNK. Policijski komesar smatra da je Uprava policije svoj posao izvršila krajnje profesionalno i zakonito. U međuvremenu o svim dešavanjima bila je upoznata i Vlada Kantona Sarajevo. Na pitanje člana Nezavisnog odbora, G-dina Čorbe da li postoje neki obavještajni podaci u pogledu novog priliva migranata, Policijski komesar je odgovorio da Uprava policije ne raspolaže sa tim podacima niti mogu imati evidenciju u pravom smislu te riječi. U principu, do države je da odluči koju će politiku voditi prema migrantima. Obavješteno je Vijeće ministara, formirano je koordinaciono tijelo za postupanje. Ono što Uprava policije neće dopustiti na području Kantona Sarajevo a to je da se zauzimaju javne površine i da se prave kompromisi.

Sjednica je završena u 17:30 sati.

PREDSJEDNIK

Samir Čorbo



četvrtak

ZAPISNIK

sa Treće sjednice Nezavisnog odbora, održane 12.06.2018. godine sa početkom rada u 16.30 sati.

Prisutni članovi: Samir Čorbo, Mirela Alihodžić, Sanela Brković, Admir Katica, Miroslav Kružik, Branimir Orašanić i Jusuf Zornić

Ispred OHR-a sjednici je prisustvovala: Dijana Šatara.

Sjednici je od 17.00 sati prisustvovao i policijski komesar Mevludin Halilović.

DNEVNI RED

-Usvajanje zapisnika sa Treće sjednice Nezavisnog odbora

4. Informacija o stanju kriminaliteta, javnog reda i mira i saobraćaja na području Kantona Sarajevo za mjesec maj 2018. godine;
5. Anonimna prijava na rad Policijskog komesara;
6. Realizacija zaključaka Nezavisnog odbora;
7. Razno.

Predloženi dnevni red je jednoglasno usvojen.

Zapisnik sa Treće sjednice Nezavisnog odbora je jednoglasno usvojen.

Do dolaska Policijskog komesara članovi Odbora su razmatrali ostale tačke dnevnog reda.

AD-2

U vezi sa dostavljenom anonimnom prijavom na rad Policijskog komesara, članovi Nezavisnog odbora su jednoglasno zaključili da se sa svakom narednom anonimnom prijavom trebaju biti upoznati članovi Nezavisnog odbora ali da isti neće postupati po istoj, osim ukoliko ista ne sadrži dokaze da se radi o pčinjenom krivičnom djelu .

AD-3

U periodu između sjednica nije bilo realiziranih zaključaka Nezavisnog odbora.

AD-4

U okviru ove tačke je dogovoreno da se naredna sjednica održi 24. jula.

AD-1

O ovoj tački dnevnog reda uvodno izlaganje podnio je Policijski komesar Halilović.

U mjesecu maju 2018. godine, na području Kantona Sarajevo registrovana su 362 krivična djela što je za 4,9% više u odnosu na isti mjesec prethodne godine.

Od ukupnog broja registrovanih krivičnih djela, 154 izvršeno je od strane poznatih, a 208 od strane nepoznatih izvršilaca.

Za 63 djela od ukupnog broja krivičnih djela prijavljenih po nepoznatom izvršiocu, naknadno je identifikovan osumnjičeni izvršilac, od čega je 38 krivičnih djela iz izvještajnog, a 25 iz ranijeg perioda.

Iz naprijed navedenog proizilazi da su službenici Uprave policije MUP-a Kantona Sarajevo u mjesecu maju 2018. godine za ukupno 217 krivičnih djela ili 59,9%, identifikovali osumnjičene izvršioce, što je za 6,2% manja rasvijetljenost u odnosu na isti mjesec prethodne godine

U izvještajnom mjesecu, registrovano je 218 krivična djela protiv imovine, što je za dva djela više u odnosu na isti mjesec prošle godine. Među djelima iz ove oblasti najbrojnije su: teške krađe – 116 djela, zatim krađe – 30, razbojništvo – 47 itd.

Za ukupno 82 djela iz ove oblasti ili 37,6% identifikovan je osumnjičeni izvršilac što je za 10,1% manja rasvijetljenost imovinskih delikata u odnosu na uporedni mjesec prethodne godine.

Na području Kantona Sarajevo u mjesecu maju ove godine izvršena su 23 krivična djela teških krađa motornih vozila od čega je osam pronađeno i vraćeno vlasnicima.

Tokom mjeseca maja 2018. godine, u odnosu na isti mjesec prošle godine, na području Kantona Sarajevo registrovano je smanjenje ukupnog broja saobraćajnih nezgoda, nezgoda sa materijalnom štetom i nastradalim licima i broja nastradalih lica.

Registrovana je 771 saobraćajna nezgoda, 713 sa materijalnom štetom i 58 sa nastradalim licima.

Raspravu je otvorio predsjednik Nezavisnog odbora, G-din Samir Čorbo pitanjem vezanim za smanjenje broja krađa m/v, odnosno da li je to posljedica nemogućnosti prisluškivanja policijske komunikacije od strane kriminalnih struktura na području Kantona Sarajevo, odnosno uvođenja novih digitalnih radio veza. Također, isti je postavio pitanje Policijskom komesaru vezano za informaciju da je u Upravi policije došlo do novih premještaja na pozicijama kada su u pitanju načelnici PU u MUP-u Kantona.

Postavio je i pitanje da li se ti učestali premještaja na odgovornim pozicijama pozitivno ili negativno odražavaju na rad Uprave policije? Obzirom na činjenicu da je prije pola godine do godinu već bila izvršena tranzicija na ovim pozicijama. Postavio je i upit da li postoji neka analiza ili pokazatelji koji opravdavaju česte promjene na pozicijama načelnika Policijskih uprava.

Odgovarajući na postavljena pitanja Policijski komesar je istakao da je u toku nabavka moderne komunikacijske opreme u iznosu od oko 500.000 KM koja onemogućava neovlašteno prisluškivanje a što je ranije bio čest slučaj. U saradnji sa općinom Centar u toku je nabavka mobilnih laptopa putem kojih će biti lakša komunikacija sa bazama podataka važnim za obavljanje policijskog posla. Na taj način moći će se izvršiti kontrola na licu mjesta, to je na neki način napredni pristup lociranja iz samog vozila a ne putem radio veze.

Što se tiče premještaja načelnika PU komesar je rekao da je to učinjeno kako bi se "osvježilo" kadar po policijskim upravama te omogućilo da se postignu bolji rezultati u radu. Osim toga, isti je istakao da je bilo pojedinih problematičnih situacija sa pojedinim načelnicima i policijskim službenicima (problem je bio kod dva načelnika) za koje je Komesar ocijenio da trebaju biti promjenjeni, te jedan inspektor i policijski službenik nisu prošli sigurnosne provjere zbog čega su morali biti razmješteni na druga radna mjesta.

Predsjednik Nezavisnog odbora, G-din Samir Čorbo postavio je pitanje Policijskom komesaru vezano za postavljanje nadzornih kamera na raskrscima o čemu je Policijski komesar na ranijim sjednicama informisao Nezavisni odbor.

Policijski komesar je odgovorio da u vezi sa nabavkom kamera imaju problem u vezi sa tenderskim procedurama odnosno tenderi stalno padaju jer jedna firma stalno podnosi žalbe, a Ured za žalbe konstantno usvaja njihove žalbe zbog čega se procedura nabavke nikako ne može okončati. Iz tog razloga, odlučeno je da se dijelovi kamera nabavljaju sukcesivno, dakle dio po dio, i da se za te dijelove provode tenderske procedure, tako da će se na taj način okončati nabavka i omogućiti postavljanje kamera na određenim raskrscima. Općina Ilidža je poklonila kućišta za kamere u vrijednosti od oko 56.000 KM. Sada trenutno su prioritet za nabavku su kamere koje registruju prekršaje.

Član Nezavisnog odbora G-din Branimir Orašanin je postavio pitanje vezano za izgradnju nove zgrade MUP-a Kantona Sarajevo kao i izmještanja saobraćajne policije na novu lokaciju.

Policijski komesar je odgovorio da ga je kontaktirao načelnik Općine Centar i da mu je ponudio tri lokacije ali komercijalnog karaktera. Do sada u opciji se nalaze nezavršen objekat JKP VIK na Pofalićima, lokacija u Novom Sarajevu, međutim do sada nije nešto puno urađeno u rješavanju ovoga problema.

Član Nezavisnog odbora G-din Jusuf Zornić je istako da bi se pitanje izgradnje nove zgrade MUP-a Kantona Sarajevo trebalo i medijski pratiti. Također, isti se osvrnuo na spisak policijskih službenika koji su stekli ili stiču uslove za odlazak u penziju.

Policijski Komesar je istakao da je to izdefinisano i da očekuje izmjene Zakona o policijskim službenicima kojim bi se razjasnile određene nedorečenosti sadašnjih zakonskih propisa.

Član Nezavisnog odbora, G-din Miroslav Kružik postavio je pitanje Policijskom komesaru vezano za potpisani sporazum o saradnji u oblasti zaštite i spašavanja ljudi i materijalnih dobara od prirodnih i drugih nesreća na području Kantona Sarajevo, kojeg su potpisali ministar unutrašnjih poslova Kantona Sarajevo G-din Vedran Mulabdić i direktor Kantonalne uprave civilne zaštite G-din Samir Džihić. Pitanje se odnosilo na uključenost Uprave policije u izradu pomenutog sporazuma.

Policijski komesar je odgovorio da Uprava policije nije bila uključena odnosno konsultovana u izradi navedenog sporazuma.

Članica Nezavisnog odbora G-đa Sanela Brković je postavila pitanje Policijskom komesaru koliko glavnih inspektora odlazi u penziju u ovom periodu.

Isti je odgovorio da je U planu da 3 glavna inspektora u narednom periodu odu u penziju.

Član Nezavisnog odbora, G-đa. Mirela Alihodžić je postavila pitanje Policijskom komesaru o problemu migranata na području Kantona Sarajevo. Također, obzirom da je na ranijim sjednicama Policijski komesar obavijestio Nezavisni odbor da će biti obezbjeđena prostorija u zgradi MUP-a za rad sa maloljetnim licima kao i da će se u radni odnos primiti psiholog dokle se došlo sa realizacijom navedenog?

Odgovarajući na postavljena pitanja Policijski komesar je odgovorio da se cijela javnost digla na noge u smislu zašto policijski službenici „tjeraju“ migrante. Jutros je bio održan

kolegij gdje će se na neki način pomoći na području općine Novo Sarajevo gdje se sad koncentrišu migranti, policija im neće dozvoliti da prave ponovo šatorska naselja kako je to ranije bilo. Imamo česte pozive građana da se skupljaju, ometaju javni red i mir, policijski službenici izađu na lice mjesta, oni čim vide policijske službenike bježe i kasnije se opet vraćaju na ista mjesta. Služba za poslove sa strancima u čijoj su nadležnosti migranti nije kapacitirana i ovaj problem se nemože adekvatno riješiti bez uključivanja kompletne zajednice.

Što se tiče prostora ranije smo imali ideju i o tome sam razgovaralo sa ministrom unutrašnjih poslova da se uzme jedna njihova prostorija za potrebe rada sa maloljetnim licima ali još uvijek to nije realizovano. Prostor nije obezbjeđen ali je nabavljena oprema. Trenutno koristimo usluge "posuđenog" psihologa Tužilaštva Kantona Sarajevo, dok se ne zaposli adekvatna osoba. Predviđeno je sistematizacijom navedeno radno mjesto i nadamo se da će se isto uskoro popuniti.

Član Nezavisnog odbora, G-đa Mirela Alihodžić postavila je pitanje Policijskom komesaru vezano za nedavno zaustavljanje saobraćaja od strane građana Kantona Sarajevo koji su nezadovoljni sa cijenama goriva.

Policijski komesar je odgovorio da su policijski službenici uzeli podatke od onih koji su ometali redovan saobraćaj, za 7 dana će poslati obavještenja i tražiti odgovor ko je upravljao vozilima.

Član Nezavisnog odbora, G-din Miroslav Kružik postavio je pitanje Policijskom komesaru vezano za adaptaciju skladišta naoružanja i opreme koje preko Ministarstva sigurnosti BiH finansira UNDP-a?

Policijski Komesar Halilović je odgovorio da je potrebno imenovati magacionera i da posotoji i pismena i usmena saglasnost da se G-din Karačić prebaci iz MUP-a na navedeno radno mjesto, međutim došao je dopis od G-đe Sabine Bukva iz MUP-a Kantona Sarajevo da se isti ne može prebaciti dok se ne popuni njegovo radno mjesto.

Također, isti se osvrnuo i na problem sa oduzetim vozilima deponovanim na Butmiru (cca 200 vozila) još iz perioda 2009./2010. godina gdje nema nikakvih uslova za deponovanje, policijski službenik samo osigurava prostor ne i vozila, na tom prostoru treba da radi depozitar koji će odgovarati i za prostor i za vozila. Potrebno je osigurati nadstrešnice, posebno kad su u pitanju nova vozila, čak je i SIPA imala naloge da se deponuju i njihova vozila. Nadležne institucije (počevši od sudova, tužilaštava i drugih državnih institucija i agencija) ne reaguju već nastoje ovaj problem "staviti pod tepih".

Sjednica je završena u 17:30 sati.

PREDSJEDNIK

Samir Ćorbo





ZAPISNIK

sa Pete sjednice Nezavisnog odbora, održane 24.07.2018. godine sa početkom rada u 16.30 sati.

Prisutni članovi: Samir Čorbo, Mirela Alihodžić, Sanela Brković, Admir Katica, Miroslav Kružik i Jusuf Zornić

Sjednici nije prisustvovao: Branimir Orašanin (opravdano)

Ispred OHR-a sjednici je prisustvovala: Dijana Šatara.

Dnevni red

-Usvajanje zapisnika sa Četvrte sjednice Nezavisnog odbora

1. Informacija o stanju kriminaliteta, javnog reda i mira i saobraćaja na području Kantona Sarajevo za mjesec juni 2018. godine;
2. Očitovanje Nezavisnog odbora o postavljenom zastupničkom pitanju Nermina Nikšića zastupnika u ZD P FBIH;
3. Izbor predsjednika i zamjenika predsjednika Nezavisnog odbora;
4. Priprema Izvještaja o radu Nezavisnog odbora za 6 mjeseci;
5. Realizacija zaključaka Nezavisnog odbora;
6. Razno.

Zapisnik sa Četvrte sjednice je povučen zbog tehničkih problema prilikom obrade istog.

Predloženi dnevni red je jednoglasno usvojen.

AD-1

Uvodne napomene o o stanju kriminaliteta, javnog reda i mira i saobraćaja na području Kantona Sarajevo za mjesec juni 2018. godine podnio je Policijski komesar **Mevludin Halilović**.

U mjesecu junu 2018. godine, na području Kantona Sarajevo registrovana su 344 krivična djela što je za četiri djela ili 1,2 % više u odnosu na isti mjesec prethodne godine.

Od ukupnog broja registrovanih krivičnih djela, 179 izvršeno je od strane poznatih, a 165 od strane nepoznatih izvršilaca. Za 57 djela od ukupnog broja krivičnih djela prijavljenih po nepoznatom izvršiocu, naknadno je identifikovan osumnjičeni izvršilac, od čega je 36 krivičnih djela iz izvještajnog, a 21 iz ranijeg perioda. Iz naprijed navedenog proizilazi da su službenici Uprave policije MUP-a Kantona Sarajevo u mjesecu junu 2018. godine za ukupno 236 krivičnih djela identifikovali osumnjičene izvršioce, što je za 0,7 % veća



rasvijetljenost u odnosu na isti mjesec prethodne godine . Najviše registrovanih krivičnih djela su djela protiv imovine, (182) što je za osam djela ili 4,2 % manje u odnosu na isti mjesec prošle godine. Među djelima iz ove oblasti najbrojnije su: teške krađe – 96 djela, zatim razbojništva – 25, krađe – 23, teška krađa na naročito opasan ili naročito drzak način 10, itd. Za ukupno 82 ova djela ili 45 % identifikovan je osumnjičeni izvršilac. Kada su u pitanju teške krađe, prema objektu izvršenja najbrojnija su bili stambeni objekti - 59, zatim motorna vozila – 31, poslovni objekti - 12 puta, itd. Na području Kantona Sarajevo u mjesecu junu ove godine izvršena su 22 krivična djela teških krađa motornih vozila od čega je sedam pronađeno i vraćeno vlasnicima.

U toku mjeseca juna 2018. godine policijski službenici su podnijeli službene izvještaje nadležnom tužilaštvu protiv osam maloljetnih lica zbog osnova sumnje da su počinili šest krivičnih djela. U poređenju sa istim mjesecom 2017. godine, broj krivičnih djela za čije izvršenje su prijavljena maloljetna lica smanjen je za 14,3%, a broj prijavljenih maloljetnih učinilaca krivičnih djela povećan je 33,3%. Prema starosnoj strukturi, pet maloljetnika je u dobi od 14 do 16 godina, a tri su u dobi između 16 i 18 godina, dok su dva maloljetnika povratnici u vršenju krivičnih djela.

Stanje saobraćaja u mjesecu junu 2018. godine u odnosu na isti mjesec prethodne godine karakteriše smanjenje ukupnog broja saobraćajnih nezgoda i nezgoda sa materijalnom štetom, dok je povećan broj nezgoda sa nastradalim licima.

Tokom mjeseca juna 2018. godine na području Kantona Sarajevo registrovane su 782 saobraćajne nezgode što je za 89 manje u odnosu na juni prethodne godine, od čega je 687 sa materijalnom štetom i 95 sa nastradalim licima. U naselju su registrovane 693 saobraćajne nezgode, a van naselja 89 nezgoda.

U diskusiji koja je uslijedila povela se rasprava o Informaciji koja je dostavljena članovima Nezavisnog odbora koja se odnosila na provedene aktivnosti Jedinice za profesionalne standarde Uprave policije MUP-a Kantona Sarajevo po navodima iz izvještaja Ad hoc tijela Komisije za sigurnost Skupštine Kantona Sarajevo u vezi predmeta „Dženan Memić“. Član Nezavisnog odbora, G-đa Mirela Alihodžić je postavila pitanje Policijskom komesaru vezano za navedenu informaciju, u smislu da se osvrnula na činjenicu da je Disciplinska komisija donijela rješenje opokretanju disciplinskog postupka broj: 02/PK-ZDK-08/17 od 10.04.2018. godine protiv policijskog službenika Dupovac Hasana, a zatim donijela zaključak o prekidu postupka za utvrđivanje disciplinske odgovornosti protiv imenovanog do okončanja krivičnog postupka ili do okončanja krivične istrage, broj: 02/PK-ZDK-08/17 od 12.04.2018. godine. Aktom broj: T09 0 KTPO 0102119 17 od 08.08.2017. godine Kantonalno tužilaštvo Kantona Sarajevo je obavjestilo Upravu policije da je donešena Naredba o obustavi istrage u krivičnom predmetu broj: T09 0 KTPO 0102119 prema više osumnjičenih, između ostalog i Dupovac Hasana. Dana 15.09.2017. godine aktom broj: 02/PK-DK-08/17 od strane Disciplinske komisije donijet je zaključak da se obustavlja disciplinski postupak protiv policijskog službenika Dupovac Hasana zbog nastupanja zastare za vođenje istog. Pitanje je ukoliko je disciplinski postupak prekinut u aprilu a istraga obustavljena u augustu, kako je moguće da je zastara nastupila 15. septembra i šta je Disciplinska komisija radila više od mjesec dana u pogledu utvrđivanja disciplinske odgovornosti policijskog službenika te na koji način je donijela zaključak o zastari. Policijski komesar je odgovorio da je u posljedopodnevnim satima dostavio detaljnu informaciju o navedenom, i da je najvjerovatnije bio kratak rok za postupanje Disciplinske komisije te je ista donijela zaključak o nastupanju zastare.

Predsjedavajući Nezavisnog odbora G-din Samir Čorbo je govorio o penzionisanju policijskih službenika koji su odavno stekli uslove za penzionisanje (Vehbija Numanović), kao i za one službenike za koje je Nezavisni Odbor dobio izvještaj od same Uprave policije – Sektora za pravne, kadrovske, logističke poslove, edukaciju i analitiku o ispunjavanju uslova za penzionisanje u 2018 godini. Konkretno, imamo slučaj Vahida Ćosića koji je po ovoj evidenciji trebao ići u penziju sa 30.04.2018 godine a do sada se to nije desilo. Na upit zašto – Policijski komesar je odgovorio da postoji određeni nesklad između Zakona o PIO F BiH i Zakona o policijskim službenicima KS koji treba da se izmjeni jer je Federalni zakon o policijskim službenicima se uskladio sa Zakonom o PIO te je isto potrebno uraditi i sa kantonalnim zakonom. U skladu sa naprijed navedenim, G-din Samir Čorbo je postavio pitanje u kom dijelu se to treba uskladiti. Policijski komesar je odgovorio da je u pitanju povoljnije regulisanje penzija – veće penzije jer se novim zakonom o policijskim službenicima F BiH propisuje da će policijski službenici imati mogućnost da uzmu najpovoljnijih 5 godina za penzionisanje. Čorbo je zatražio objašnjenje zašto se ne postupa po postojećim zakonima jer nema logike da se čeka izmjena zakona za koju se uopšte ne zna kada će biti obzirom da je prijedlog istoga skinut sa dnevnog reda i da se uopšte ne zna kada će biti sljedeća sjednica Skupštine KS, idu godišnji odmori itd. Do kada će se ima namjeru čekati? Također je konstatovao da se Policijski komesar ne treba baviti poslovima iz nadležnosti PIO i time da li će i kolika visina penzije biti te da te poslove ostavi u nadležnosti PIO, njegov posao je da utvrdi postojanje ili ne postojanje uslova za penzionisanje. Čorbo je podvukao i to da se u konkretnom slučaju radi o odlasku u penziju po sili zakona ne po volji Nezavisnog odbora niti po volji Policijskog komesara. Ukoliko policijski službenik ili drugi uposlenik Uprave policije stekne uslove za penziju a istom ne prestane radni odnos po sili zakona onda Policijski komesar krši zakona na štetu budžeta, jer ti službenici dobijaju plaću na teret budžetskih obveznika.

Predsjedavajući Čorbo je postavio pitanje Policijskom komesaru da li je zatražena evidencija (listing i potvrda o stažu) za službenike koji su po evidenciji Uprave policije stekli uslove za penzionisanje? Obrazlažući pitanje time da smatra da bi logičan slijed događaja bio da nadležna organizaciona jedinica nadležna za kadrove, morala najkasnije 2 mjeseca prije ispunjavanje uslove za penzionisanje zatražiti ove podatke od PIO/MIO. U konkretnom slučaju po pitanju određenih policijskih službenika to je moralo biti zatraženo možda i prije stupanja na snagu novog zakona o PIO/MIO. Komesar je odgovorio da koliko mu je poznato nisu jer se čeka izmjena zakona pa onda penzionisanje.

Predsjedavajući Čorbo je tražio obrazloženje u vezi Vehbije Numanovića. Komesar je odgovorio da je u pitanju period kada je ovaj premješten externo u Federalni MUP i da oni s tim nemaju više ništa u smislu da do momenta prelaska oni imaju evidenciju a od prelaska on postaje obaveza F MUP-a, te da se sada pokušava sva odgovornost prebaciti na MUP KS što je potpuno nepravedno. Predsjedavajući Čorbo je skrenuo pažnju na činjenicu da ukoliko se ipak pokaže da je imenovani Vehbija Numanović ispunjavao uslove za penzionisanje u decembru 2010. godine to značiti da je isti za navedeni vremenski period dobivao nezakonito plaću i ostvarivao i ostala prava iz radnog odnosa a da za to nije postojao zakonski osnov. Ko će odgovarati ako se navedene činjenice utvrde kao istinite?

Član Nezavisnog odbora Sanela Brković je konstatovala da policijski službenici na eksternom premještanju u F MUP-u ostvaruju samo pojedinačna prava iz radnog odnosa, pravo na plaću, plaćeno/neplaćeno odsustvo i sl. ali rješenja o prestanku radnog odnosa donosi Policijski komesar Kantona Sarajevo, odnosno zasnivanje i

prestanak radnog odnosa je vezan za MUP Kantona Sarajevo. Netačna je tvrdnja da za policijske službenike koji su na eksternom premještanju, uslove za penzionisanje i radni staž treba da utvrdi MUP FBiH.

Član Nezavisnog odbora, G-din Jusuf Zornić je dodao i to da ti policijski službenici dobijaju po osnovu staža i minuli rad, te se na svakoj platnoj listi vidi i minuli i ukupan radni staž, te da je nemoguće da Uprava policije nema pouzdane podatke o radnom stažu – jer kako se onda isplaćuje minuli rad? Istakao je da je Vehbija Numanović uposlenik MUP-a KS a ne MUP-a FBiH. Prava iz radnog odnosa ostvaruje u MUP-u FBiH-a prestanak je u Kantonalnom MUP-u. Čak je u aprilu 2017. godine direktor MUP-a FBiH poslao akt svim kantonalnim mupovima u kojem traži informacije vezano za odlazak u penziju policijskih službenika koji se nalaze u navedenoj instituciji na eksternom premještanju kako bi se na vrijeme vratili u matične mup-ove i penzionisali.

Policijski komesar je još jednom istakao da se izmjene i dopuna Zakona o PIO/MIO odnose samo na nivo Federacije ali ne i na Kantonalni nivo. Kantoni su dužni izmjeniti svoje zakone o policijskim službenicima koji će u pogledu penzionisanja imati iste odredbe kao i Zakon o policijskim službenicima FBiH. Istakao je da će on donijeti rješenja o prestanku radnog odnosa jedino u slučaju ako time neće prekršiti neki zakon. Sektor za pravne, kadrovske, logističke poslove, edukaciju i analitiku je taj koji treba dostaviti Policijskom komesaru rješenje o prestanku radnog odnosa na potpis kada utvrdi da neki od policijskih službenika ispunjava uslove za odlazak u penziju. Naglasio je da će sutra pomoćnik za pravne poslove biti poslan u PIO da utvrdi da li Policijski komesar krši zakon ako donese rješenje o prestanku radnog odnosa. Također, isti će tražiti da se Vehbija Numanović vrati sa eksternog premještanja.

Predsjedavajući Nezavisnog odbora G-din Samir Čorbo, postavio je pitanje Policijskom komesaru vezano za izgradnju zgrade MUP-a Kantona Sarajevo i podataka iz medija da će se na tom prostoru graditi stambeno-poslovni objekat. Policijski komesar je istakao da je načelnik općine Novo Sarajevo predložio prostor za izgradnju na području navedene općine i krenulo se u proceduru, te je sa istim upoznat i premijer KS. Međutim, Zavod za izgradnju je istakao da na tom zemljištu prava imaju pet vlasnika te se od toga odustalo. Potom se krenulo u pregovore vezano za zemljište odnosno objekat koji pripada Vodovodu i Skupština Kantona je trebala samo donijeti odluku da se to zemljište dodijeli MUP-u Kantona Sarajevo/Upravi policije. Postojeći objekat se trebao srušiti ili da se postigne nagodba, međutim ministar Hasanspahić je na posljednjoj sjednici Vlade to osporio istaknuvši da sjednici Vlade ne prisustvuje premijer i da su njegova saznanja da od ranije postoji sporazum potpisan između premijera KS i Fonda za izgradnju stanova u kojem je definisano da će se na tom području gradi stambeno-poslovni objekat.

Odgovarajući na pitanje Predsjedavajućeg Nezavisnog odbora G-din-a Samira Čorbe, ko vrši ocjenjivanje policijskih službenika, posebno za period 2016/2017 godina obzirom da se na osnovu ocjene rada vrši unapređivanje, Policijski komesar je odgovorio da Pravilnik o ocjenjivanju definiše da ukoliko policijski službenik nije disciplinski kažnjava on može biti unaprijeđen. Kada se govori o policijskom službeniku Dupovac Hasanu, Policijski komesar je istakao da je taj isti policijski službenik prvi ukazao na to da u predmetu „Dženan Memić“ nije riječ o saobraćajnoj nesreći. U tom kontekstu, onda treba uzeti u obzir i ostalih 22 policijska službenika koji su također učestvovali u navedenom predmetu a unaprijeđeni su. Isti je također naglasio da se nikada više neće desiti da se greške Tužilaštva prebacuju na Upravu

policije i policijske službenike. Iako više ne postoji mogućnost da se vode bilo kakve unutrašnje istrage, zbog zastare, isti je naložio da se još jednom prođe kroz cjelokupan predmet „Dženan Memić“ i utvrde eventualni propusti policijskih službenika.

Na konstataciju kako je Hasan Dupovac potpuno neovlašteno po izvještaju ad hoc tijela prisustvovao obdukciji te da li je to uredu? Da li je neko odgovorao što su ovi predmeti otišli u zastaru, te kako je moguće da šef organizacione jedinice koji je bio prisutan kada je ad hoc tijelo utvrđivalo propuste nije „odmah po saznanju“ za počinjenje prekršaja iste pokrenuo disciplinski postupak, a ne čekao izvještaj ad hoc tijela, zatim sve to uputili u tužilaštvo pa se čekao odgovor od njih iako pitanje disciplinske odgovornosti nema nikakve veze sa krivičnom odgovornošću. Te da je isti postupak urađen kod svih službenika u predmetu Đenana Memić. Komesar je odgovorio da on ne zna sve detalje, da ne misli da se to uradilo sa namjerom te da je o svemu i rješenjima ovlaštenih jedinica Uprave policije i razlozima zašto je došlo do zastare ranije slao pa treba tamo pogledati sve je obrazloženo.

Na kraju sjednice Nezavisni odbor je jednoglasno donio sljedeće zaključke:

Nezavisni odbor će izvršiti analizu dokumentacije vezanu za provedene unutrašnje istrage i disciplinske postupke protiv policijskih službenika Uprave policije MUP-a Kantona Sarajevo obuhvaćenih izvještajem AD hoc tijela za vršenje nadzora nad zakonitošću rada MUP-a Kantona Sarajevo u predmetu Dženan Memić. Nezavisni odbor traži od Policijskog komesara dostavljanje ocjena rada navedenih policijskih službenika za period 2016 i 2017 godina. Nezavisni odbor će nakon izvršene analize predmetne dokumentacije, procijeniti dalje aktivnosti u smislu vršenja svojih nadležnosti praćenja rada policijskog komesara te obaveze nadzora radom Uprave policije i primjenom policijskih ovlaštenja.

Nezavisni odbor traži od policijskog komesara da u skladu sa zaključkom Vlade Kantona Sarajevo, broj: 02-05-37183-12/17 od 29.12. 2017. godine, pristupi penzionisanju policijskih službenika, državnih službenika i namještenika u Upravi policije, koji su po evidenciji Sektora za pravne, kadrovske, logističke poslove, edukaciju i anaitiku, ispunili uslove za penzionisanje u skladu sa važećim propisima, te da Nezavisni odbor informiše o preduzetim aktivnostima najkasnije do naredne sjednice Nezavisnog odbora, kao i da informiše Nezavisni odbor da li je Uprava policije vršila uplatu doprinosa PIO za period 18. septembar 1991. godine do 23. decembra 1995. godine.

Nezavisni odbor traži od Policijskog komesara informaciju, da li je Uprava policije od PIO/MIO zatražila listing odnosno potvrdu o stažu za policijske službenike, državne službenike i namještenike u MUP-u Kantona Sarajevo koji u toku 2018. godine ispunjavaju uslove za penzionisanje, te da li je uskladila evidencije za navedena lica sa PIO/MIO.

Nezavisni odbor traži od Policijskog komesara detaljnu informaciju po prijedlogu povlačenja jednog policijskog službenika MUP-a Kantona Sarajevo koji je eksterno premješten u MUP-a FBiH i poduzetim aktivnostima o provjeri radnog staža u smislu ispunjavanja uslova za penzionisanje i njegovom hitnom penzionisanju u slučaju postojanja uslova za isto.

Nezavisni odbor traži od Policijskog komesara dostavljanje informacije u vezi zaključenja ugovora o radu za novoprimitljenih 120 policijskih službenika. Naime, MUP Kantona Sarajevo je potpisao ugovor sa 118 službenika iz razloga što su dva kandidata odustala, pa je nejasno zašto Uprava policije nije pozvala slijedeća 2 kandidata sa rang liste koji ispunjavaju uslove za prijem.

Nezavisni odbor traži i dostavljanje informacije o mogućoj prodaji vatrenog oružja marke "GLOCK" treće generacije, CZ 75 i 85 i ostalog u izvještaju navedenog naoružanja, sa zahtjevom da se za navedeno vatreno oružje koje se više ne može koristiti kao službeno naoružanje radi starosti ili oštećenja, dostavi lista oružja sa njihovim nazivom, na kojoj će se jasno odvojiti zastarjelo oružje od oružja koje ima određena oštećenja. Za oružje koje se iz razloga starosti ne može koristiti, zatraženo je da se navede godina nabavke istoga, a za oružje sa oštećenjima da se navede vrsta oštećenja.

Nezavisni odbor traži od Policijskog komesara da Nezavisnom odboru dostavi Pravilnike o posebnoj uniformi za specifične grografsko-klimatske uslove policijskih službenika Uprave policije MUP-a KS, sa svim izmjena i dopunama te akte/incijative koje je policijski Komesar podnosio u vezi izmjena istih. Navedeno je neophodno obzirom na činjenicu da je Uredbom o jedinstvenoj policijskoj uniformi u FBiH propisan jedinstven izgled policijske uniforme te Nezavisni odbor želi provjeriti usklađenost navedenog Pravilnika sa pomenutom Uredbom.

AD-2

Povodom zahtjeva za očitovanjem na postavljena zastupnička pitanja zastupnika u Zastupničkom domu FBiH Nermina Nikšića, Nezavisni odbor je pripremio odgovor koji će biti upućen Zastupničkom domu Parlamenta FBiH, i to:

Nezavisni odbor na sjednici održanoj dana 24.07.2018. godine razmatrao je upućena zastupnička pitanja zastupnika Nermina Nikšića te u vezi sa istim dostavlja sljedeće odgovore:

1. Odgovori koje je tražio zastupnik Nermin Nikšić u zastupničkim pitanjima pod rednim brojevima: 1., 2., 4., 5., i 6. nisu u nadležnosti Nezavisnog odbora;
2. Radi sačinjavanja adekvatnog odgovora na zastupničko pitanje pod rednim brojem 3., a koje se odnosi na radno pravni status i penzionisanje policijskog službenika Vehbije Numanovića, Nezavisni odbor je zatražio detaljnu informaciju od Policijskog komesara MUP-a Kantona Sarajevo koju je isti dostavio aktom broj: 02-185 od 12.07.2018. godine.

Razmatrajući činjenice navedene u naprijed navedenoj informaciji, a konstatujući da se iz iste ne može zaključiti da li policijski službenik Vehbija Numanović ispunjava uslove za odlazak u penziju, Nezavisni odbor je tražio od Policijskog komesara da se policijski službenik Vehbija Numanović povuče u Upravu policije MUP-a Kantona Sarajevo kako bi se za istog izvršila provjera dužine radnog staža u smislu ispunjavanja uslova za penzionisanje i njegovom hitnom penzionisanju u slučaju postojanja uslova za isto.

AD-3

Na osnovu člana 9. stav (1) Poslovnika o radu Nezavisnog odbora za Predsjednicu je izabrana Mirela Alihodžić a za njenog zamjenika Samir Čorbo.

AD-4

Nezavisni odbor je zadužio Samira Čorbu da pripremi Izvještaj o radu Nezavisnog odbora za prvih 6 mjeseci.

Istovremeno, zadužen je član Nezavisnog odbora G-din Admir Katica da sačini analizu u vezi sa Informacijom koja je dostavljena članovima Nezavisnog odbora koja se

odnosila na provedene aktivnosti Jedinice za profesionalne standarde Uprave policije MUP-a Kantona Sarajevo po navodima iz izvještaja Ad hoc tijela Komisije za sigurnost Skupštine Kantona Sarajevo u vezi predmeta „Dženan Memić“.

AD-5

U ovom periodu nije bilo zaključaka koji su realizovani.

AD-6

U okviru ove tačke dnevnog reda razmatrana je anonimna prijava dostavljena Nezavisnom odboru. U skladu sa zaključkom sa posljednje sjednice Nezavisnog odbora održane 12.06.2018. godine, Nezavisni odbor neće postupati po istoj obzirom da ista ne sadrži dokaze o počinjenom krivičnom djelu.

Sjednica je završena u 19.15 satl.

PREDSJEDNIK

Samir Čorbo





ZAPISNIK

sa Šeste sjednice Nezavisnog odbora, održane 28.08.2018. godine sa početkom rada u 16.30 sati.

Prisutni članovi: Samir Čorbo, Mirela Alihodžić, Sanela Brković, Admir Katica, Miroslav Kružik, Jusuf Zornić i Branimir Orašanin.

Ispred OHR-a sjednici je prisustvovao: Senad Zlatar.

Dnevni red

-Usvajanje zapisnika sa Četvrtе i Pete sjednice Nezavisnog odbora

1. Informacija o stanju kriminaliteta, javnog reda i mira i saobraćaja na području Kantona Sarajevo za mjesec juli 2018. godine;
2. Realizacija zaključaka Nezavisnog odbora;
3. Razno.

Zapisnici sa Četvrtе i Pete sjednice su jednoglasno usvojeni.

Predloženi dnevni red je jednoglasno usvojen.

AD-1 i AD-2

Uvodne napomene o o stanju kriminaliteta, javnog reda i mira i saobraćaja na području Kantona Sarajevo za mjesec juli 2018. godine podnio je Policijski komesar Mevludin Halilović.

U mjesecu julu 2018. godine, na području Kantona Sarajevo registrovano je 320 krivičnih djela što je za četiri djela manje u odnosu na isti mjesec prethodne godine. Od ukupnog broja registrovanih krivičnih djela, 165 izvršeno je od strane poznatih, a 155 od strane nepoznatih izvršilaca. Za 50 djela od ukupnog broja krivičnih djela prijavljenih po nepoznatom izvršiocu, naknadno je identifikovan osumnjičeni izvršilac, od čega je 27 krivičnih djela iz izvještajnog, a 23 iz ranijeg perioda. Iz naprijed navedenog proizilazi da su službenici Uprave policije MUP-a Kantona Sarajevo u mjesecu julu 2018. godine za ukupno 215 krivičnih djela identifikovali osumnjičene izvršioce, što je za 2,1 % veća rasvijetljenost u odnosu na isti mjesec prethodne godine.

U odnosu na isti mjesec prethodne godine, zabilježeno je smanjenje broja registrovanih krivičnih djela za četiri. Najznačajnije smanjenje zabilježeno je u oblasti protiv imovine (za 16) i zdravlja ljudi (za sedam), dok je povećanje evidentirano u oblasti krivičnih djela protiv sigurnosti javnog prometa (za 10), opće sigurnosti ljudi i imovine itd.

U izvještajnom mjesecu, registrovana su 164 krivična djela protiv imovine, što je za 16 djela manje u odnosu na isti mjesec prošle godine. Među djelima iz ove oblasti najbrojnije su: teške krađe – 83 djela (21 manje), zatim razbojništva – 30 (tri više), krađe – 27 (jedna više), teška krađa u pokušaju – sedam (pet više), oštećenje tuđe stvari sedam (osam manje), itd. Za ukupno 65 ovih djela identifikovan je osumnjičeni izvršilac što je za 1,5 % manje u odnosu na juli prethodne godine. Kada su u pitanju teške krađe, prema objektu izvršenja najbrojniji su bili stambeni objekti – 43 (15 manje), zatim motorna vozila (otuđenja pmv i "provale" u ista) – 37 slučajeva (21 manje), poslovni objekti – osam puta (sedam manje), itd. Na području Kantona Sarajevo u mjesecu julu ove godine izvršeno je 29 krivičnih djela teških krađa motornih vozila od čega je osam pronađeno i vraćeno vlasnicima.

Na području Kantona Sarajevo u mjesecu julu 2018. godine u odnosu na isti mjesec prethodne godine smanjen je ukupan broj saobraćajnih nezgoda i nezgoda sa materijalnom štetom, a povećan broj nezgoda sa nastradalim licima i broj povrijeđenih lica. Registrovane su 822 saobraćajne nezgode, od čega je 746 sa



materijalnom štetom i 76 sa nastradalim licima. U navedenim nezgodama nije bilo poginulih lica, 12 je teže, a 93 lica su lakše povrijeđena.

U diskusiji koja je uslijedila povela se rasprava o izjašnjenjima koje je članovima Nezavisnog odbora dostavio Policijski komesar, a koje su se odnosile na zaključke koje je Nezavisni odbor usvojio na sjednici održanoj 24.07.2018. godine.

Prva za riječ se javila G-đa Mirela Alihodžić komentarišući dostavljena izjašnjenja u smislu da su ista trebala biti mnogo sažetija. Ista je istakla da je od Policijskog komesara zatraženo dostavljanje informacije (a ne izjašnjenja) i da su se ista mogla dostaviti na jednom listu papira. Sasvim je suvišno da skoro svako od dostavljenih izjašnjenja ima preko 100 stranica, a izjašnjenje Jedinice za profesionalne standarde čak ima preko 500 stranica. Većina dostavljenog materijala se odnosi na izjašnjenja organizacionih jedinica Uprave policije, zatim se dostavljaju dijelovi zakonskih i podzakonskih akata, izvodi iz Pravilnika o sistematizaciji za pojedina radna mjesta što je sasvim nebitno. U tom smislu, ista je tražila od Policijskog komesara da se ubuduće (ukoliko je to moguće) dostavljaju kraće informacije koje imaju veze sa traženim podacima. Osim navedenog, ista je konstatovala da je od dana održavanja posljednje sjednice, od strane Policijskog komesara dostavljeno mnogo informacija ali Nezavisnom odboru nije dostavljena informacija vezano za događaj – video snimak koji je objavljen na jednom od portala iz kojeg je vidljivo da policijski službenik šamara muškarca. Odgovorajući na naprijed navedeno, Policijski komesar je istakao da je otvorena unutrašnja istraga i da je formiran predmet na kojem trenutno radi Jedinica za profesionalne standarde. Osim navedenog, G-đa Alihodžić je zatražila od Policijskog komesara da dostavi pisanu izjavu o imovinskom stanju na dan kada je imenovan za Policijskog komesara a što je definisano članom 43. stav (2) Zakona o unutrašnjim poslovima Kantona Sarajevo.

Policijski komesar je u vezi sa dostavljenim izjašnjenjima istakao da je tražio od svih organizacionih jedinica u UP MUP-a KS da dostave svoja izjašnjenja na zaključke Nezavisnog odbora, koja je istom i dostavio.

Gdin. Samir Čorbo se osvrnuo na djelove izjašnjenja koji se odnose na prodaju oštećenog oružja, odnosno da je između ostalog u dostavljenom izjašnjenju navedeno da se isto prodaje jer nije održavano, te je u tom smislu postavio pitanje da li postoji u UP MUP-a KS pravni akt (Pravilnik) kojim bi se regulisalo redovno održavanje oružja. Policijski komesar je odgovorio da postoji Pravilnik kojim je regulisano na koji način se duži naoružanje. Također je naglasio da u dostavljenom izjašnjenju se navodi da je oružje u takvom stanju predato u magacin. UNDP je dao dio sredstava, imenovan je magacioner i krenuće se sa obnovom magacinskog prostora koji je u posljednje tri godine neuslovan za skladištenje oružja obzirom da je magacin prostor koji je usupljen na korištenje od strane FMUP-a. Pištolji koji su na prodaju većinom su nabavljeni u periodu 1995./1996. godina.

Gdin. Čorbo se osvrnuo i na dio izjašnjenja koji se odnosi na izbor 120 policijskih službenika (od kojih su neki odustali) u smislu da je jasno da sadašnji zakon ne dozvoljava da se taj broj popunjava sa sljedećim kandidatima sa liste. Ali je isto tako naglasio da prilikom izrade izmjena i dopuna zakona treba i o tome voditi računa da se doda odredba koja bi omogućavala da se radna mjesta mogu popunjavati sljedećim kandidatima sa liste.

Isto tako, G-din Samir Čorbo se osvrnuo i na predmet „Dženan Memić“ gdje smatra da je indikativno da niko od nadređenih policijskih službenika nije pokrenuo disciplinski postupak protiv određenog broja policijskih službenika koji su počinili propuste u radu na navedenom predmetu. Npr. policijski službenik Olga Vukša sačinjava službenu zabilješku u kojoj konstatuje da policijski službenik Hasan Dupovac prisustvuje obdukciji iako mu to nije u opisu radnog mjesta. Nadređeni policijski službenik uopće ne poduzima ništa u toj situaciji iako je znao i morao znati za navedene propuste. Iz naprijed navedenog razloga smatra da je čitav lanac komandovanja zakazao u UP MUP-a Kantona Sarajevo.

G-đa Mirela Alihodžić je postavila pitanje Policijskom komesaru vezano za ocjenu rada policijskih službenika, osvrćući se na odredbe dostavljenog Pravilnika o ocjenjivanju, ko na kraju donosi i potpisuje rješenje o ocjeni rada. Policijski komesar je naglasio da on potpisuje rješenje o ocjeni na prijedlog nadređenog policijskog službenika.

Gdin. Branimir Orašanin je postavio pitanje komesaru da li je aktuelna vlast i u kojoj mjeri pomogla Upravi policije u rješavanju problema izgradnje objekta MUP-a Kantona Sarajevo.

Policijski komesar je odgovorio da je navedeno pitanje pokrenuo prilikom posjete načelniku Općine Novo Sarajevo. Tom sastanku je prisustvovao i ministar unutrašnjih poslova Kantona Sarajevo. Jedinica za saobraćaj je već trebala biti iseljena iz prostorija u kojim se nalazi jer postoji pravosnažna presuda. Prostor koji je ponuđen je bio na granici između Općine Novo Sarajevo i Općine Novi Grad. Međutim oko tog prostora je postojao imovinsko-pravni spor i od toga se odustalo. Nadalje je ponuđen prostor koji je bio u vlasništvu Vodovoda o čemu je isti govorio na prošloj sjednici, čak je i na sjednici Vlade Kantona bila tačka o ustupanju tog prostora MUP-u Kantona Sarajevo pod određenim uslovima ali je ministar Hasanspahić skinuo tu tačku sa dnevnog reda jer po njegovom saznanju postoji ranije zaključen sporazum oko tog prostora između Vodovoda i Vlade Kantona Sarajevo. Općina centar je ponudila prostor koji ne bi išao na licitaciju već na općinsko vijeće a drugi prijedlog je prostor na Vilsonovom. Taj prostor na Vilsonovom je mali i

također nisu riješeni imovinsko-pravni odnosi. Osim toga, ponuđen je i prostor u Nahorevu, ali zbog izgradnje objekta bi morao biti izmjenjen regulacioni plan. Također, postoji i parcela iza zgrade Vijeća ministara BiH odnosno tržnog centra SCC-a za koji imamo saznanja da je predviđena koncertna dvorana.

G-đa Sanela Brković se osvrnula na izjašnjenje vezano za ispunjavanje uslova za odlazak u penziju policijskog službenika Vehbije Numanovića i dostavljeni odgovor Federalnog zavoda za penzijsko i invalidsko osiguranje u vezi s tim. Ista je naglasila da je iz dostavljenog odgovora vidljivo da isti ne ispunjava uslove za odlazak u penziju te se iz tog razloga, po njenom mišljenju, navedeni policijski službenik ne treba povlačiti iz FMUP-a. Ista je također dodala da se treba dopuniti izješnjenje Uprave policije u dijelu koji se odnosi na uplatu doprinosa Uprave policije MUP-a Kantona Sarajevo za period do sticanja finansijske samostalnosti, odnosno statusa budžetskog korisnika.

Policijski komesar je naglasio da do sticanja finansijske samostalnosti Uprava policije nije uplaćivala doprinose već je postojala Uredba Vlade FBiH da se za period od 1991. do 1995. godine Federacija iz Budžeta izdvaja sredstva za te namjene. Također postoji i sudska presuda za 1996. godinu da FMUP uplaćuje doprinose za tu godinu i sve do 01.01.2017. godine Ministarstvo je uplaćivalo doprinose.

Gdin. Admir Katica je upoznao policijskog komesara da je izvršavajući zaključak Nezavisnog odbora sa prethodnog sastanka, izvršio Analizu postupanja Uprave policije po navodima iz Izvještaja Ad hoc tijela u predmetu „Dženan Memić“. U tom kontekstu, naveo je da je njemu kao tadašnjem v.d. policijskom komesaru dostavljen pomenuti izvještaj 03.02. 2017. godine te da osim traga o signiranju na nadležne organizacione jedinice, ne postoji trag da je preduzeo bilo kakvu aktivnost u cilju hitnog postupanja te sprečavanja nastupanja apsolutne zastare u disciplinskim predmetima. Policijski komesar je odgovarajući na to pitanje naveo da su rokovi bili jako kratki te da je Jedinica za profesionalne standarde nezavisna u svom radu i radi u skladu sa posebnim pravilnikom. Gdin Admir Katica je naveo da je jedan od principa Strategije rada Uprave policije (dostavljen članovima Nezavisnog odbora na sjednici) postizanje integriteta i ugleda policije te jačanje povjerenja građana u policiju, te da u tom smislu od policijskog komesara očekuje pojačani angažman u tom cilju, kako kroz sistem nagrađivanja tako i kroz objektivno i efikasno disciplinsko sankcionisanje policijskih službenika. Primjer postupanja po ad hoc Izvještaju u predmetu Dženan Memić, nije dobar primjer takvog postupanja, te da bi bilo neophodno promijeniti tu praksu".

Osim navedenog, G-din Admir Katica postavio je pitanje Policijskom komesaru vezano za eksterni premještaj policijskog službenika Vehbije Numanovića, koliko se dugo isti nalazi na eksternom premještaju, čija je procjena bila da se imenovani pošalje na eksterni premještaj i koja je svrha eksternog premještaja? Policijski komesar je odgovorio da je policijski službenik Vehbija Numanović dva puta eksterno premješten u FMUP, što je i zakonska mogućnost, i da bi se 2019. godine trebao vratiti u Upravu policije. Zahtjev FMUP je bio da se upravo taj policijski službenik, imenom i prezimenom eksterno premjesti i tadašnji komesar je donio rješenje o eksternom premještaju. Isti je naglasio da je eksterni smještaj imao smisla kada je u funkciji bila Policijska akademija.

G-din Samir Čorbo je naglasio da je Sektor za pravne, kadrovske, logističke poslove, edukaciju i analitiku prije donošenja rješenja o eksternom premještaju policijskom službeniku Vehbiji Numanoviću izdalo uvjerenje o stažu. Sasvim je nelogično da Uprava policije čiji je Sektor izdao rješenje, nakon dvije godine traži od FMUP-a informaciju o radnom stažu za tog istog policijskog službenika.

Policijski komesar je odgovorio da Uprava policije ne raspolaže sa informacijom u vezi uplaćenih doprinosa za policijskog službenika dok se isti nalazi na eksternom premještaju jer se npr. sada ispostavilo da policijskom službeniku Vehbiji Numanoviću nisu uplaćeni doprinosi za 2012. i 2013. godinu.

G-din Samir Čorbo je naglasio da to nema nikakve veze jer Uprava policije opet ima svoju evidenciju i treba da zna koliko isti ima staža neovisno od toga jer njemu na drugom radnom mjestu uplaćen staž. Ponovno je naglasio da je Uprava policije u momentu izdavala uvjerenja o stažu znala koliko je imenovani policijski službenik imao staža.

Gdin. Jusuf Zornić se osvrnuo na zapisnik sa kolegija Uprave policije u čiji su posjed došli članovi Nezavisnog odbora u kojem je navedeno njegovo ime sa netačnim navodima vezano za predmet „Dženan Memić“ i rad Jedinice za profesionalne standarde na navedenom predmetu, u smislu da će on nešto privatno istražiti. Naglasio je da se on samo osvrnuo na disciplinski postupak koji je vođen protiv policijskog službenika Hasana Dupovca u smislu da se isti nije ni trebo voditi jer je već bila nastupila zastara vođenja disciplinskog postupka. U vezi prodaje oružja putem licitacije isti je na prethodnoj sjednici samo naglasio da mu nije logičan broj oružja koje se prodaje i da smatra da se vrijednije oružje ne treba prodavati za neke sitne novce. Smatra da je preko 1000 pištolja veliki broj za prodaju odnosno licitaciju. Također je naglasio da Policijskom komesaru niko ne želi zlo i da se niko ne želi dovoditi u kontekst nekih privatnih istraga pogotovo sa stanovišta što je isti bio član Ad hoc tijela i zaista se trudi da uopće ne komentariše ni sudjeluje u raspravi kada je u pitanju predmet „Dženan Memić“ upravo iz razloga jer bi neko mogao zaključiti da se nalazi u svojevrsnom „sukobu interesa“. S tim u vezi, zatraženo je od Policijskog komesara, obzirom da je Nezavisni odbor kolektivni organ, da se ubuduće na kolegijimima ili bilo gdje drugo samo argumentovano i tačno prenose izjave članova Nezavisnog odbora.

Policijski komesar je odgovorio da je nakon prethodne sjednice Nezavisnog odbora održao kolegij i zatražio da se svi očituju u vezi sa postavljenim pitanjima i traženim informacijama Nezavisnog odbora. Također je naglasio da su neki od učesnika kolegija izrazili svoju sumnju u pogledu postojanja „sukoba interesa“ člana Nezavisnog odbora Jusufa Zornića u vezi predmeta „Dženan Memić“ jer je isti bio i član Ad hoc tijela formiranog upravo za navedeni predmet.

Osvrćući se na predložene izmjene Zakona o policijskim službenicima, Policijski komesar je naglasio da je ministar unutrašnjih poslova povukao zakon koji je prethodno upućen Skupštini Kantona Sarajevo u kojem je ranije utvrđen prosjek od 5 godina za računanje penzije, na isti način kako je definisano i federalnim zakonom. Sadašnji prijedlog pomenutog zakona upućen je na Vladu Kantona bez njegovog znanja i konsultacije a u istom se ne nalazi odredba o prosjeku 5 godina za računanja penzije. Prema njegovom saznanju i Sindikat je učestvovao u izradi navedenog prijedloga zakona i smatra da se neosnovano bujne jer su bili aktivni učesnici u izradi istog.


G-đa Alihodžić se osvrnula na predstavke dva policijska službenika koji su prosljeđeni Nezavisnom odboru od strane ministra unutrašnjih poslova na nadležno postupanje, iako Nezavisni odbor nije nadležan da postupa po istim. Policijski komesar je naglasio da se u Republici Srpskoj koristi termin staž osiguranja a u FBiH penzioni staž. Policijski službenici čije predstavke su prosljeđene Nezavisnom odboru nisu dali saglasnost da im se ratni staž računa u dvostrukom trajanju te iz tog razloga ne mogu da ostvare pravo na penziju. Također, ista se osvrnula i na predstavku policijskog službenika Nermina Lokvančića odnosno preporuke Institucije ombudsmena za ljudska prava Bosne i Hercegovine koje su donesene u ovom predmetu i dostavljene Upravi policije na postupanje. Ista je postavila pitanje da li je u navedenom roku koji je navela institucija ombudsmena u svom aktu poslan odgovor Uprave policije a Policijski komesar je odgovorio da je rok ispoštovan i da je odgovor dostavljen pomenutoj instituciji.

Na kraju sjednice Nezavisni odbor je sačinio saopštenje za javnost koje je upućeno sredstvima javnog informisanja.

AD-3

U vezi žalbe policijskog službenika Nermina Lokvančića istaknuto je da Nezavisni odbor nije nadležan da postupa po navedenom predmetu.

Sjednica je završena u 19.45 sati.

PREDSJEDNICA

Mirela Alihodžić

ZAPISNIK

sa Sedme sjednice Nezavisnog odbora, održane 20.09.2018. godine sa početkom rada u 16.30 sati.

Prisutni članovi: Samir Čorbo, Mirela Alihodžić, Sanela Brković, Admir Katica, Miroslav Kružik, Jusuf Zornić i Branimir Orašanić.

Sjednici su prisustvovali: Ispred OHR-a: Michael Haner i Senad Zlatar te predstavnici američke ambasade i EU u Bosni i Hercegovini.

Sjednici je prisustvovao: Policijski komesar Mevludin Halilović

Dnevni red

- Usvajanje zapisnika sa Šeste sjednice Nezavisnog odbora
- 5. Informacija o stanju kriminaliteta, javnog reda i mira i saobraćaja na području Kantona Sarajevo za mjesec avgust/kolovoz 2018. godine;
- 6. Razmatranje dostavljene primjedbe na rad Policijskog komesara;
- 7. Razmatranje odgovora na izjašnjenje zastupnice Segmedine Srna Bajramović;
- 8. Izjašnjenje u vezi sa žalbom Berbika Dragana;
- 9. Realizacija zaključaka Nezavisnog odbora;
- 10. Razno.

Predloženi dnevni red je jednoglasno usvojen.

Zapisnik sa Šeste sjednice je jednoglasno usvojen.

AD-1

Uvodne napomene o o stanju kriminaliteta, javnog reda i mira i saobraćaja na području Kantona Sarajevo za mjesec avgust 2018. godine podnio je Policijski komesar Mevludin Halilović.

U mjesecu avgustu 2018. godine, na području Kantona Sarajevo registrovano je 305 krivičnih djela što je za 7,6% manje u odnosu na isti mjesec prethodne godine. Od ukupnog broja registrovanih krivičnih djela, 108 izvršeno je od strane poznatih, a 197 od strane nepoznatih izvršilaca. Za 68 djela od ukupnog broja krivičnih djela prijavljenih po nepoznatom izvršiocu, naknadno je identifikovan osumnjičeni izvršilac, od čega su 44 krivična djela iz izvještajnog, a 24 iz ranijeg perioda. Iz naprijed navedenog proizilazi da su službenici Uprave policije MUP-a KS u izvještajnom mjesecu za ukupno 176 krivičnih djela identifikovali osumnjičene izvršioce, što je za 0,2% manje u odnosu na isti mjesec prethodne godine. Zbog postojanja osnova sumnje da su počinili krivična djela prijavljena su 153 lica, od čega je 85 povratnika u izvršenju krivičnih djela, četiri maloljetnika, a 59 lica je lišeno slobode. U mjesecu avgustu 2018. godine u odnosu na isti mjesec prethodne godine, zabilježeno je smanjenje broja registrovanih krivičnih djela za 25. Smanjenje je registrovano u oblastima: protiv zdravlja ljudi, braka porodice i mladeži, opće sigurnosti ljudi i imovine, sigurnosti javnog prometa, javnog reda i pravnog prometa.... itd. dok je povećanje zabilježeno u oblastima protiv slobode i prava čovjeka i građanina, života i tijela i pravosuđa. U ovom mjesecu, registrovano je 209 krivičnih djela protiv imovine, što je za jedno djelo manje u odnosu na isti mjesec prošle godine. Među djelima iz ove oblasti

najbrojnije su: teške krađe – 125 djela, zatim krađe – 23, razbojništvo – 33, oštećenje tuđe stvari – 11 itd.

Za ukupno 87 ovih djela ili 41,6% identifikovan je osumnjičeni izvršilac što je za 4% veća rasvijetljenost ovih djela u odnosu na isti mjesec predhodne godine. Kada su u pitanju teške krađe, prema objektu izvršenja najbrojnija su bila motorna vozila - 48 slučajeva, zatim slijede stambeni objekti - 45, poslovni prostori - 23, itd.

Na početku rasprave za riječ se javila član Nezavisnog odbora Brković Sanela čestitajući Komesaru na usvojenom Zakonu o policijskim službenicima, te pitala o zdravstvenom stanju policijskih službenika koji su povrijeđeni tokom protesta demobilisanih boraca.

Policijski komesar je odgovorio da su u pitanju lakše tjelesne povrede koje je zadobilo nekoliko policijskih službenika. Jedan od njih je povrijeđen u glavu obzirom da su prilikom protesta korišteni drveni predmeti, palice, flaše itd. Sada su svi dobro i vratili su se na svoja radna mjesta i počeli su obavljati svakodnevne radne zadatke.

Član Nezavisnog odbora Samir Čorbo postavio je pitanje Komesaru dali je određeno mjesto za proteste u Kantonu Sarajevo.

Odgovarajući na pitanje, Policijski komesar je odgovorio da do sada po tom pitanju nije ništa urađeno, obzirom da o istom odluku treba da donesu općinska vijeća ali određivanje lokacije na kojoj će se omogućiti održavanje protesta još nije stavljeno na dnevni red. Ranije je bilo predloženo nekoliko lokacija i na tome je sve stalo.

Član Nezavisnog odbora Branimir Orašanić je postavio pitanje Policijskom komesaru da li je bilo pomaka u pronalaženju nove lokacije za izgradnju zgrade MUP-a Kantona Sarajevo, da li se nešto promijenilo u odnosu na posljednju sjednicu Nezavisnog odbora na kojoj je Policijski komesar već dao odgovor na ovo pitanje.

Policijski komesar je odgovorio da u odnosu na posljednju sjednicu Nezavisnog odbora nije bilo pomaka po ovom pitanju.

Član Nezavisnog odbora Miroslav Kružić postavio je pitanje Policijskom komesaru koliko policijskih službenika nije prošlo posljednje sigurnosne provjere.

Policijski komesar je odgovorio da 8 policijskih službenika nije prošlo sigurnosne provjere. U jednom slučaju se čak radi o falsifikovanju diplome gdje je policijski službenik priznao da je kupio diplomu za određenu sumu novca i tako stekao određeno zvanje. Protiv istog će biti poduzete odgovarajuće mjere a za ostale policijske službenike će se postupiti na način kao da se radi o prekobrojnim policijskim službenicima. O navedenom je upoznat ministar unutrašnjih poslova i sindikat od kojih se traži uključenost u navedenu problematiku.

Član Nezavisnog odbora Admir Katica je postavio pitanje Policijskom komesaru da li je pročitao pismo koje su medijima uputili „policijski službenici tretirani izvještajem ad hoc tijela“ i da li je njihovo ponašanje u skladu sa policijskom etikom, relevantnim zakonskim i podzakonskim aktima.

Policijski komesar je odgovorio da je o navedenom pismu obavještena Jedinica za profesionalne standarde i da je zatražena unutrašnja istraga. Predmet će se dostaviti Odboru za žalbe. Kada je u pitanju njegovo mišljenje o pismu koje je objavljeno u medijima, Policijski komesar je naglasio da je on napisao pismo on bi isto i potpisao i stao iza onoga što je u njemu navedeno. Naglasio je da mu je stavljena meta na čelo i dijelom saopštenjem Nezavisnog odbora sa posljednje sjednice. Istakao je kako je Nezavisni odbor tražio uvjerenja o ocjenama rada, da se u svom aktu isti poziva na odredbe relevantnih zakona a ti podaci su ranije dostavljeni i ništa nije sakriveno. Što se tiče disciplinskog postupka koji je vođen protiv policijskih službenika koji su načinili propuste u

radu na predmetu „Dženan Memić“, on smatra da se za 6 dana nije mogla voditi istraga niti završiti disciplinski postupak. Također smatra da se ne treba dodatno vršiti pritisak na policijske službenike. On je primio nekoliko zahtjeva za prestanak radnog odnosa koje je stavio u ladicu da se stvari smire. U navedenom predmetu danas (op. 20.09.) je Nezavisnom odboru dostavljeno njegovo zadnje izjašenje u predmetu „Dženan Memić“ i misli da je dosta.

Ne čekajući da mu se dadne riječ od strane Predsjedavajuće Nezavisnog odbora i kršeći odredbe Poslovnika o radu Nezavisnog odbora, riječ je uzeo predstavnik OHR-a Michael Haner ističući da smatra da je Nezavisni odbor prekoračio svoja ovlaštenja "ulazeći predaleko u slučaj Dženan Memić". OHR prati cijeli sistem. On lično prati sistem već 23 godine i to sistem koji je prema njegovim riječima uspostavila međunarodna zajednica. S tim u vezi on smatra da je Nezavisni odbor išao predaleko u svom radu. Istakao je da je međunarodna zajednica tu da prati sistem, Nezavisni odbor nije pravosudni organ, nije izvršna vlast i zato je on došao danas na sjednicu Nezavisnog odbora da to kaže. Naglasio je da nije tajna da OHR radi sa policijom. Rekao je da se član Nezavisnog odbora, Admir Katica sjeća izgradnje sistema obzirom da je u to vrijeme bio savjetnik Federalnog ministra unutrašnjih poslova i da se i tada išlo predaleko. Od 1995. godine do danas u pitanju je isti sistem. Glavni interes međunarodne zajednice je da brani policiju. Posebno je naglasio da će ubuduće o bilo kakvom zahtjevu Nezavisnog odbora upućen Policijskom komesaru u smislu dostavljanja određenih informacija prvobitno mišljenje dati međunarodna zajednica (posebno naglasivši ulogu OHR-a) posebno sa aspekta da li taj zahtjev ide predaleko i ulazi u operativnu samostalnost Policijskog komesara.

Član Nezavisnog odbora Miroslav Kružik postavio je pitanje predstavniku OHR-a Michael Haner-u zašto smatra da je Nezavisni odbor otišao predaleko u svom radu posebno jer je aludirao na određene političke konotacije.

Član Nezavisnog odbora Admir Katica je postavio je pitanje predstavniku OHR-a Michael Haner-u kako pratiti rad Policijskog komesara a ne pratiti njegovu osnovnu funkciju i to nadzor nad radom Policijskog komesara, nadzor nad onim kako Policijski komesar nadzire rad Uprave policije i primjenu policijskih ovlaštenja, što je Zakonom o unutrašnjim poslovima jedna od glavnih funkcija Nezavisnog odbora. Istakao je da on ne krije da je upravo on sačinio analizu dostavljene dokumentacije u predmetu „Dženan Memić“ i da smatra da se u pogledu pokretanja i vođenja disciplinskog postupka moglo brže raditi. Istakao je da se moglo raditi i vikendom jer u ovakvim slučajevima to nalaže i profesionalna etika. Sugerisao je Policijskom komesaru da se na osnovu iskustva iz ovog predmeta i načinjenih propusta, za policijske službenike organizuje seminar/obuka vezano za osiguranje dokaza i mjesta događaja (počinjenja krivičnog djela). Što se tiče političkog uticaja naglasio je da niko od članova Nezavisnog odbora nije član niti jedne stranke, već istaknuti stručnjaci iz oblasti kriminalistike i prava, što je zapravo i jedan od uslova da bi neko mogao postati član Nezavisnog odbora. O tome su članovi Nezavisnog odbora prilikom apliciranja morali dati izjavu pod punom materijalnom, krivičnom i moralnom odgovornošću. Naglasio je da članovi Nezavisnog odbora u istom zastupaju ineterese građana Kantona Sarajevo. U pismu policijskih službenika koje je objavljeno u medijima imaju i određene prijetnje gdje se na kraju teksta kaže: „I na kraju konstatacija, ako Glavna tužiteljica Kantonalnog tužilaštva KS, postupajući tužitelji, policijski službenici Uprave policije MUP-a Kantona Sarajevo, bez bilo kakvih dokaza, mogu proganjati, osuđivati i linčovati, znajte da u takvom haosu, po istoj matrici, i na vas može doći red“. U tom kontekstu, postavio je pitanje da li ova prijetnja ima krivičnopravnu sadržinu i da li međunarodna zajednica štiti ovakve policajce koji prijete?

Predstavnik OHR-a Michael Haner je opet ponovio da je Nezavisni odbor ušao u operativnu samostalnost Policijskog komesara i za sve što je rekao član Nezavisnog odbora Admir Katica treba da istraže drugi organi a ne Nezavisni odbor. Isti je naglasio da

je Nezavisni odbor provodio istrage i inspekciju tražeći određene informacije i šaljući zahtjeve za dostavu dokumentacije Policijskom komesaru.

Član Nezavisnog odbora Samir Čorbo je postavio pitanje Predstavniku OHR-a Michael Haner-u da navede bar jedan primjer gdje je Nezavisni odbor preuzeo ingerencije Policijskog komesara i ušao u njegovu operativnu samostalnost. Također je postavio pitanje istom koja je osnovna dužnost Policijskog komesara u skladu sa odredbama Zakona o unutrašnjim poslovima Kantona Sarajevo, obzirom da je isti naglasio da je ekspert u toj oblasti i da je uz pomoć međunarodne zajednice usvojen navedeni Zakon. Istakao je da Nezavisni odbor kada je u pitanju predmet „Dženan Memić“ je izvršio analizu samo sa aspekta utvrđivanja eventualne odgovornosti Policijskog komesara a ne pojedinih policijskih službenika.

Predstavnik OHR-a Michael Haner nije znao odgovor na pitanje koja je osnovna dužnost Policijskog komesara u skladu sa odredbama Zakona o unutrašnjim poslovima Kantona Sarajevo, niti je naveo konkretan primjer u kojem je Nezavisni odbor prekoračio granice svojih ovlaštenja i ušao u operativnu samostalnost Policijskog komesara. Istakao je da je uloga međunarodne zajednice da brani Policijskog komesara od političkog uticaja.

Predsjedavajuća Nezavisnog odbora Mirela Alihodžić postavila je pitanje Policijskom komesaru kome isti odgovara za svoj rad: međunarodnoj zajednici (OHR-u) ili Nezavisnom odboru?

Na navedeno pitanje se nadovezala član Nezavisnog odbora Sanela Brković koja je naglasila da je Nezavisni odbor dobio inicijativu zastupnice Segmedine Srne Bajramović kojom se traži od Nezavisnog odbora dostavljanje informacije Skupštini Kantona Sarajevo o pokrenutim postupcima i rezultatima istih, eventualnim zastarama disciplinskih postupaka, razlozima zastare, te odgovornim osobama za propuštene postupke u predmetu „Dženan Memić“. Dakle ponovno se od Nezavisnog odbora traži da dostavi informacije o predmetu „Dženan Memić“. Nezavisni odbor će obavijestiti Skupštinu Kantona Sarajevo o ovome što je rekao predstavnik OHR-a Michael Haner u pogledu stava da će u vezi dostavljanja određenih informacija prvobitno mišljenje dati međunarodna zajednica sa aspekta da li taj zahtjev ide predaleko i ulazi u operativnu samostalnost Policijskog komesara jer za navedeno ne postoji zakonski osnov.

Predstavnik OHR-a Michael Haner je naglasio da bi svrha Nezavisnog odbora trebala da bude pozitivna saradnja sa Policijskim komesarom i da se treba voditi računa gdje je granica njegove operativne samostalnosti i da se ne prelazi ta granica a on smatra da je Nezavisni odbor prekoračio tu granicu tražeći od Policijskog komesara određene informacije.

Član Nezavisnog odbora Samir Čorbo je ponovno postavio pitanje Predstavniku OHR-a Michael Haner-u da navedene primjer informacije kojom je Nezavisni odbor ušao u operativnu samostalnost Policijskog komesara.

Predstavnik OHR-a Michael Haner je rekao da su to informacije koje se tiču penzionisanja policijskih službenika, te informacije koje se odnose na rad Policijskog komesara i njegovu operativnu samostalnost.

Član Nezavisnog odbora Samir Čorbo je objasnio predstavniku OHR-a Michael Haner-u da je nadležna služba Uprave policije dostavila Nezavisnom odboru u januaru 2018. godine podatke o policijskim službenicima koji u aprilu ispunjavaju uslove za odlazak u starosnu penziju. U junu mjesecu 2018. godine Nezavisni odbor postavlja pitanje Policijskom komesaru da li su za te policijske službenike donesena rješenja o prestanku radnog odnosa. Policijski komesar odgovara da nisu jer se čeka izmjena postojećeg Zakona o policijskim službenicima Kantona Sarajevo. Dakle, Policijski komesar ne primjenjuje postojeći Zakon nego čeka izmjene i dopune Zakona koje će biti ili neće biti usvojene. I ko će odgovarati za to što su neki policijski službenici primali plaću za mjesec kada su već trebali biti penzionisani i ko će snositi odgovornost što je Budžet Kantona oštećen za određeni novčani iznos.

Član Nezavisnog odbora Branimir Orašanin je naglasio da treba spustiti loptu. Smatra da su svi podjednako važni i međunarodna zajednica i Policijski komesar i Nezavisni odbor i svi trebaju sa stanovišta svojih nadležnosti pomoći društvu. Istakao je da je u prethodnom sazivu Nezavisnog odbora bio kratko ali je sadašnji Nezavisni odbor kroz ocjenu rada Policijskog komesara pokazao da vjeruje Polcijskom komesaru. Ne ulazeći u rad prethodnog komesara poznate su nam pokidane veze između Kantonalnog tužilaštva i Uprave policije Kantona Sarajevo. Smatra da su te veze sada puno bolje. Također, Nezavisni odbor nije tu da sudi niti ima tu ulogu, on je tu da pomogne i da bude nezavistan. Nezavisni odbor se ne miješa niti će se miješati u operativnu samostalnost Polcijskog komesara. Ukoliko Policijski komesar kada primi neku informaciju smatra da se istom ulazi u njegovu operativnu samostalnost neka to onda objasni i ako bude valjana argumentacija Nezavisni odbor će to uzeti u obzir. Nezavisni odbor nema za cilj da ruši sistem i s tim u vezi izrazio je stav da se treba razgovarati i spustiti lopta. Zamolio je međunarodnu zajednicu, Polcijskog komesara kao i kolege iz Nezavisnog odbora da sarađuju skupa. Naglasio je da bi i on mogao svašta reći u predmetu „Dženan Memić“ ali ističe da ne treba stavljati metu na Policijskog komesara ističući da je predmet završen i da će se isti i pravosudno okončati. Obzirom da je Policijski komesar došao na navedeno mjesto u (po njemu) izuzetno teškim uslovima, postavio je pitanje može li mu se kako pomoći? Naglasio je da Policijskom komesaru niko nije htio nanijeti zlo. Član Nezavisnog odbora Admir Katica je uradio analizu čisto da svima bude lakše i da saznamo šta se usitinu dogodilo. Svi smo tu da sarađujemo. Istakao je da je možda bio preopširan ali je želio da bude dostojanstven.

Član Nezavisnog odbora Samir Čorbo istakao je da mu nije jasno zašto Policijski komesar ističe da mu je Nezavisni odbor svojom analizom stavio metu jer upravo kroz analizu Nezavisnog odbora se pokazalo da u predmetu „Dženan Memić“ ne postoji odgovornost Policijskog komesara. Zbog toga ne vidi razlog da se analiza stavlja u taj kontekst. Ukoliko Nezavisni odbor ne može da kontroliše obaveze koje su za Policijskog komesara taksativno pobrojane u Zakonu o unutrašnjim poslovima Kantona Sarajevo, onda postojanje Nezavisnog odbora nema svoju svrhu i svi članovi treba da podnesu ostavku. Predstavniku OHR-a Michael Haner-u je naglasio da je on na sjednicu Nezavisnog odbora došao dva puta, prvi put kad je podnesena inicijativa za smjenu Polcijskog komesara i sada.

Predstavnik OHR-a Michael Haner je ponovno naglasio da smatra da je Nezavisni odbor izašao iz okvira svoje nadležnosti i to je njegov stav.

Član Nezavisnog odbora Miroslav Kružik je postavio pitanje predstavniku OHR-a Michael Haner-u šta će se desiti ukoliko Nezavisni odbor ne dostavi odgovor u vezi podnesene inicijative zastupnice Segmedine Srna Baramović.

Predstavnik OHR-a Michael Haner je ponovio da je Nezavisni odbor otišao predaleko sa informacijom koju je tražio i da je time ušao u operativnu samostalnost Policijskog komesara. Istakao je da Nezavisni odbor nema pravo da mjeri šta je operativna samostalnost i da nema mogućnost da zna gdje taj pravac ide.

Član Nezavisnog odbora Samir Čorbo je istakao da predstavnik OHR-a Michael Haner nije naveo niti jedan konkretan primjer u kojem se vidi da je Nezavisni odbor izašao iz okvira svoje nadležnosti. Također, isti samo ima svoj stav koji ničim nije obrazložen.

Predstavnik OHR-a Michael Haner je dodao da oni samo brane policiju u pogledu budućih zahtjeva Nezavisnog odbora koji će se slati prema Policijskom komesaru.

Predsjedavajuća Nezavisnog odbora Mirela Alihodžić je upitala predstavnika OHR-a Michael Haner-a na koji način je došao do informacije da Nezavisni odbor ulazi u operativnu samostalnost Policijskog komesara. Isti je odgovorio da ga je o tome obavijestio Policijski komesar. Predsjedavajuća je zatim upitala istog da li je tražio eventualno objašnjenje od strane Nezavisnog odbora u vezi sa informacijama koje mu je dao Policijski komesar kako bi saslušao obje strane i donio konačan stav o istom.

Predstavnik OHR-a Michael Haner je odgovorio da nije tražio nikakva objašnjenja od Nezavisnog odbora već je sam donio stav o onome što mu je rekao Policijski komesar.

Policijski komesar Mevludin Halilović je dodao da on sve informacije šalje Nezavisnom odboru, čak je informacije koje se odnose na unutrašnje istrage protiv policijskih službenika sam dostavljao Nezavisnom odboru iako to od njega nije traženo. Istu informaciju je dostavio i Komisiji za sigurnost i ministru kako bi o istom bila obavještena Skupština Kantona Sarajevo. Također, naglasio je da mu se ne može inputirati da je izvršio bilo kakav uticaj na rad Jedinice za profesionalne standarde. Istakao je da on kao Policijski komesar nema nikakvog uticaja na rad Jedinice za profesionalne standarde, kao ni na rad Odbora za žalbe javnosti. Sve istrage su završene i prije zakonskog roka. Misli da je Jedinica za profesionalne standarde dobro radila svoj posao i da je on kao Policijski komesar omogućio da se svi postupci okončaju na vrijeme. Po njegovom mišljenju sve se maksimalno uradilo kako ne bi nastupila zastara. Neki su čak željeli da se vode disciplinski postupci i čak je unutrašnja kontrola nastupila preošto kako bi se utvrdili eventualni propusti.

Predsjedavajuća Nezavisnog odbora Mirela Alihodžić je podsjetila Policijskog komesara na posljednju sjednicu Nezavisnog odbora na kojoj je iznijela mišljenje da Policijski komesar dostavlja preširoke informacije koje se obično sastoje od izjašnjenja pojedinih Sektora Uprave policije i na kojoj je naglasila Policijskom komesaru, ukoliko postoji mogućnost, da se dostavljaju kraće informacije koje će se referisati samo na ono što je tražio Nezavisni odbor.

Član Nezavisnog odbora Miroslav Kružik je rekao da niko nije spočitao Policijskom komesaru da nije dostavio neke informacije. Također je naglasio da je predsjedavajuća na zadnjoj sjednici naglasila da se Nezavisnom odboru dostavljaju isključivo kratke informacija i to u skladu sa zakonom. Po njegovom mišljenju to uopće nije operativna samostalnost već statistički podaci.

Član Nezavisnog odbora Admir Katica je naglasio da kada je riječ o vođenju disciplinskog postupka i radu disciplinske komisije da ista nije dosljedna u svom radu jer u jednom predmetu kaže da je nastupila zastara i okončava disciplinski postupak a u drugom predmetu, iako je nastupila zastara vodi disciplinski postupak, odlučuje u meritumu i oslobađa policijskog službenika disciplinske odgovornosti. Čak disciplinska komisija uopće ne ulazi u razmatranje mogućnosti prekida zastare poduzimanjem određenih radnji. Istakao je da je njemu kao predstavniku građana dužnost da te stvari kaže Policijskom komesaru. Nezavisni odbor je za jedan dan proveo disciplinski postupak protiv bivšeg Policijskog komesara, saslušao svjedoke i donio odluku. Istu efikasnost bi trebala pokazati i Uprava policije i to u cilju jačanja ugleda policije i integriteta svih policijskih službenika.

AD-2

Predsjedavajuća Nezavisnog odbora Mirela Alihodžić je u vezi sa tačkom 2. postavila pitanje Policijskom komesaru da li upoznat sa aktom Advokata (Gavr Rankapetanović Bekir-Koldžo Damir-Kukić Emir-Gavr Rankapetanović Džemila) vezano za zahtjev Panjeta Jasmina za povrat pištolja kojeg je stekao u vlasništvo na osnovu ugovora o poklonu od nasljednika prethodnog vlasnika. Policijski komesar je odgovorio da nije upoznat sa sadržinom navedenog akta i da će Nezavisnom odboru dostaviti informaciju o istom kako bi odbor mogao da zauzme konačan stav.

AD-3

Povodom zahtjeva Institucije Ombudsmena za izjašnjenjem Nezavisnog odbora u vezi sa žalbom Berbika Dragana, Nezavisni odbor je zauzeo stav da postupanje po navodima iz dostavljenog akta Institucije Ombudsmena nisu u nadležnosti Nezavisnog odbora i da svoja prava iz radnog odnosa G-din Berbika može ostvarivati putem suda. Isto obrazloženje važi i za penzionisanog policijskog službenika Maslovarić Slavka.

AD-4

Nezavisni odbor će dostaviti informaciju Skupštini Kantona Sarajevo u vezi sa inicijativom zastupnice S.S.Bajramović.

AD-5

U okviru ove tačke dnevnog reda nije bilo nerealizovanih zaključaka Nezavisnog odbora.

AD-6

U okviru ove tačke nije bilo diskusije obzirom da su članovi Nezavisnog odbora tokom cijele sjednice razgovarali o pismu kojeg su uputili policijski službenici i koje je objavljeno u medijima a koje je bilo prvobitno stavljeno pod ovu tačku dnevnog reda.

Sjednica je završena u 18.55 sati.

PREDSJEDNICA


Mirela Alihodžić



ZAPISNIK

sa Osme sjednice Nezavisnog odbora, održane 16.10.2018. godine sa početkom rada u 17:00 sati.

Prisutni članovi: Samir Ćorbo, Mirela Alihodžić, Sanela Brković, Admir Katica, Miroslav Kružik, Jusuf Zornić i Branimir Orašanić.

Sjednici su prisustvovali: Ispred OHR-a: Senad Zlatar

Sjednici je prisustvovao: Policijski komesar Mevludin Halilović

Dnevni red

- Usvajanje zapisnika sa Sedme sjednice Nezavisnog odbora
 1. Informacija o stanju kriminaliteta, javnog reda i mira i saobraćaja na području Kantona Sarajevo za mjesec septembar/rujan 2018. godine;
 2. Izjašnjenje Nezavisnog odbora po zahtjevu Agencije za zaštitu ličnih podataka;
 3. Realizacija zaključaka Nezavisnog odbora;
 4. Razno.

Predloženi dnevni red je jednoglasno usvojen.

Zapisnik sa Sedme sjednice je jednoglasno usvojen.

Nakon što je usvojen Zapisnik predsjedavajuća Nezavisnog odbora Mirela Alihodžić je postavila pitanje Policijskom komesaru vezano za email koji je poslao sekretaru Nezavisnog odbora a u vezi sa zahtjevom da mu se ubuduće dostavljaju svi zapisnici sa sjednica Nezavisnog odbora, kao i materijal koji će se razmatrati na sjednicama. Naime, od strane Policijskog komesara poslana dva email-a, od kojih je jedan bio naredbodavnog tona i da istim na neki način Policijski komesar preuzima kontrolnu ulogu koju treba da ima Nezavisni odbor sa aspekta Zakona o unutrašnjim poslovima Kantona Sarajevo. S tim u vezi, ista je postavila pitanje Policijskom komesaru da li je on poslao oba email-a, odnosno da li je neko drugi, bez njegovog znanja, poslao e-mail. Policijski komesar je odgovorio da je on poslao email-ove i da mu je potreban zapisnik sa prethodne sjednice kako bi mogao dostaviti izjašnjenje Agenciji za zaštitu ličnih podataka u Bosni i Hercegovini. Nadovezujući se na postavljeno pitanje, član Nezavisnog odbora Admir Katica je pročitao oba email-a i to prvi u kojem je navedeno: "Poštovani, molimo da nam pošaljete zapisnik sa prethodne sjednice kao i ostali materijal po dnevnom redu za narednu sjednicu". Nakon što je sekretar Nezavisnog odbora dostavio odgovor na e-mail u kojem je navedeno da zapisnik sa prethodne sjednice nije usvojen i da mu se ne može poslati od strane Policijskog komesara poslan je novi e-mail, i to: „Molimo vas da nam pošaljete dva zadnja usvojena zapisnika i ubuduće nam šaljite svaki zapisnik po usvajanju". Član Nezavisnog odbora Admir Katica je dodao da je prvi e-mail sasvim korektan i umjeren ali da je drugi e-mail naredbodavnog tona. Policijski komesar je odgovorio da je smatrao da ima pravni osnov da traži da mu se dostavi zapisnik posebno zbog činjenice što mu je ranije dostavljen zapisnik sa pete sjednice. Predsjedavajuća Nezavisnog odbora Mirela Alihodžić je naglasila da je nemoguće da mu je dostavljen zapisnik jer se zapisnik sa sjednica dostavlja samo članovima Nezavisnog odbora. Predstavnik OHR-a Senad Zlatar se nadovezao i rekao da je i njima dostavljen zapisnik sa treće i pete sjednice Nezavisnog odbora. Sekretar Nezavisnog odbora je naglasio da to nije moguće jedino da nije došlo do greške da bi potom isti rekao da je vjerovatno pogriješio i da im je dostavio draft zapisnika sa navedenih sjednica. Predsjedavajuća Nezavisnog odbora Mirela Alihodžić, uz saglasnost ostalih članova Nezavisnog odbora je naglasila sekretaru da se ubuduće strogo vodi računa kome se dostavljaju materijali i zapisnici sa sjednica i



da se nikome osim članovima Nezavisnog odbora ne mogu dostavljati niti materijali niti zapisnici neovisno da li se radi o draftu istih ili ne. Također je pojasnila Policijskom komesaru da podnese pisani zahtjev za dostavu zapisnika i na isto će mu pisanim putem biti odgovoreno od strane Nezavisnog odbora.

AD-1

Uvodne napomene o stanju kriminaliteta, javnog reda i mira i saobraćaja na području Kantona Sarajevo za mjesec septembar 2018. godine podnio je Policijski komesar Mevludin Halilović.

U mjesecu septembru 2018. godine, na području Kantona Sarajevo registrovano je 321-no krivično djelo što je za 19 djela manje u odnosu na isti mjesec prethodne godine. Od ukupno broja registrovanih krivičnih djela, 161 izvršeno je od strane poznatih izvršilaca, a 160 od strane nepoznatih izvršilaca. Za 52 djela od ukupnog broja krivičnih djela prijavljenih po nepoznatom izvršiocu, naknadno su identifikovani osumnjičeni izvršioci, od čega su 33 krivična djela iz izvještajnog mjeseca, a 19 iz ranijeg perioda. Službenici Uprave policije MUP-a KS su mjesecu septembru 2018. godine za ukupno 212 krivičnih djela identifikovali osumnjičene izvršioce, što je za 9,6% više u odnosu na isti mjesec prethodne godine. Zbog postojanja osnova sumnje da su počinili krivična djela prijavljeno je 200 lica, od čega je 108 povratnika u izvršenju krivičnih djela, pet maloljetnika, a 81-no lice je lišeno slobode.

U ovom mjesecu, registrovana su 192 krivična djela protiv imovine, što je za 40 djela manje u odnosu na isti mjesec prošle godine. Među djelima iz ove oblasti najbrojnije su: teške krađe – 99 djela (42 manje), krađe – 23 (11 manje), razbojništvo – 28 (jedno više), oštećenje tuđe stvari – 20 (pet više), utaja - sedam (tri više), itd. Za ukupno 88 ovih djela identifikovani su osumnjičeni izvršioci, što je 7,9% viša rasvijetljenost u odnosu na uporedni mjesec. Kada su u pitanju teške krađe, prema objektu izvršenja najbrojnija su bila motorna vozila – 38 puta (35 manje), zatim stambeni objekti – 30 puta (18 manje), poslovni prostori - 21 put (četiri više), itd. Tokom mjeseca septembra na području Kantona Sarajevo izvršeno je 25 krivičnih djela teških krađa motornih vozila od čega su tri pronađena i vraćena vlasnicima. Broj teških krađa motornih vozila, u odnosu na uporedni mjesec, smanjen je za 21 a zbog postojanja osnova sumnje da su učestvovali u otuđenju motornog vozila nadležnom tužilaštvu u mjesecu septembru 2018. godine podnesen je službeni izvještaj protiv dva lica.

U toku mjeseca septembra 2018. godine policijski službenici su uručili/podnijeli 356 prekršajna naloga i zahtjeva za pokretanje prekršajnog postupka zbog narušavanja javnog reda i mira, što u odnosu na isti mjesec 2017. godine predstavlja povećanje za 33. Prekršajne sankcije preduzete su protiv 384 lica, što predstavlja povećanje za 39. Najveći broj prekršajnih sankcija odnosi se na prekršaje učinjene prosjačenjem (150).

Na području Kantona Sarajevo u mjesecu septembru 2018. godine u odnosu na isti mjesec prethodne godine smanjen je ukupan broj saobraćajnih nezgoda i nezgoda sa materijalnom štetom, dok je povećan broj nezgoda sa nastradalim licima i broj povrijeđenih lica. Registrovano je 788 saobraćajnih nezgoda (14,8% manje u odnosu na septembar prethodne godine), od čega je 720 sa materijalnom štetom (16,4% manje) i 68 sa nastradalim licima. U navedenim nezgodama jedno lice je poginulo, 17 je teže, a 66 lica je lakše povrijeđeno.

Otvarajući raspravu Član Nezavisnog odbora Branimir Orašanić se osvrnuo na naprijed navedene uvodne napomene Policijskog komesara posebno sa aspekta krađe m/v u Kantonu Sarajevo. Istakao je da je ranije Policijski komesar naglašavao da ima saradnju sa ostalim organima u Kantonu vezano za suzbijanje krađe m/v te postavio pitanje Policijskom komesaru da li postoji način da rezultati prikazani u dostavljenoj informaciji budu još bolji.

Policijski komesar, gosp. Halilović je istakao da je Uprava policije imala nekoliko sastanaka sa FMUP-om ali nije bilo nekih pomaka u saradnji vezano za povoljšanje situacije vezane za krađu m/v. Također, održan je sastanak sa načelnikom općine Istočno Novo Sarajevo te je pokušano da se zajednički organizuju stalne policijske patrole na pojedinim punktovima. Kada je poslan poziv da se usaglase stavovi nije bilo pozitivnog odgovora. Uprava policije je svojim operativnim radom otkrila dvije grupe lica koja "operišu"-krađu m/v u Kantonu Sarajevo. Navedeni podaci dostavljeni su Kantonalnom Tužilaštvu sa zabilješkom ali su isti vraćeni uz konstataciju da se navedeni podaci dostave Tužilaštvu Bosne i Hercegovine obzirom da isti imaju obilježja organizovanog kriminala. Policijski komesar je naglasio da je Uprava policije ranije imala praksu da se pojačaju aktivnosti policijskih službenika vezano za navedenu problematiku ali u zadnje vrijeme to nije bilo moguće zbog angažiranosti policijskih službenika na protestima, izborima, tokom nogometnih utakmica i sl.

Član Nezavisnog odbora Miroslav Kružić je predložio Policijskom komesaru da informacije koje dostavlja Nezavisnom odboru budu više informativne prirode te da se ne dostavljaju detaljni operativni podaci. Također je naglasio da dostavljene informacije trebaju biti što je moguće kraće. Čak i kada su u pitanju informacije koje se odnose na migrante a koje su dostavljane u proteklom periodu Nezavisnom odboru sadrže mnogo materijala i operativnih podataka koje članovima Nezavisnog odbora nisu potrebne za rad.

Član Nezavisnog odbora Samir Čorbo je postavio pitanje Policijskom komesaru u vezi sa činjenicom postojanje dva pravilnika o izgledu i nošenju policijskih uniformi, te da li je Policijski komesar, i šta konkretno poduzeo da se stanje u ovoj oblasti uredi. Policijski komesar je odgovorio da je formirao Radnu grupu za izradu teksta novog Pravilnika te je upućen dopis ministru unutrašnjih poslova Kantona Sarajevo da se izjasni koji Pravilnik je na snazi. Pored navedene problematike problem predstavlja i Instrukcija o hitnom, tekućem i povremenom izjašnjenju iz 2002. godine. Za istu Uprava policije nema informaciju da li je stavljena van snage. Na izlaganje Policijskog komesara nadovezao se član Nezavisnog odbora Samir Čorbo istakavši da zahtjev vezano za policijske uniforme Policijski komesar može dostaviti i Nezavisnom odboru koji će o tome informisati Vladu Kantona.

Član Nezavisnog odbora Jusuf Zornić se osvrnuo na policijske uniforme ističući da za UP Trnovo i Hadžići zbog posebnih vremenskih uslova policijski službenici posjeduju drugi tip uniforme koja je prilagođena planinskim uslovima.

Član Nezavisnog odbora Miroslav Kružik dodao je u vezi navedene problematike da je to istovremeno i političko pitanje i da se ne može zanemariti činjenica da na nivou Federacije Bosne i Hercegovine postoji Uredba o jedinstvenoj policijskoj uniformi. Policijski komesar je dodao da bi se po njegovom mišljenju navedena Uredba trebala izmijeniti i dopuniti.

Član Nezavisnog odbora Samir Čorbo se osvrnuo na izmjene Zakona o policijskim službenicima Kantona Sarajevo koji je u međuvremenu stupio na snagu te je u vezi sa istim postavio pitanje Policijskom komesaru da li je pristupio penzionisanju odnosno izradi rješenja o prestanku radnog odnosa svih policijskih službenika koji ispunjavaju propisane uslove, a budući da je na jednoj od prethodnih sjednica Policijski komesar obrazlažući zašto ne primjenjuje postojeći (tada važeći) Zakon o policijskim službenicima, u smislu prestanka radnog odnosa policijskih službenika, izjavio da čim se usvoji novi zakon oni idu u penziju tj. prestaje ime radni odnosu u Upravi policije. Policijski komesar je istakao da je FMUP pripremio obrasce koje treba popuniti svaki policijski službenik (u smislu izjave o ratnom stažu) da li pristaje da mu se računa staž za vrijeme ratnog perioda ili ne i da iste dostave kadrovskoj službi. Na ovu konstataciju Policijskog komesara član Nezavisnog odbora Samir Čorbo je istakao da je prethodno Policijski komesar dao potpuno drugačije obrazloženje te smatra da ustvari čekajući da novi zakon stupi na snagu omogućeno je pojedincima koji su po starom zakonu ispunjavali uslove za prestanak radnog odnosa da sada mogu ostati još nekoliko godina u radnom odnosu. Također je dodao da je ranije, od strane Policijskog komesara, Nezavisnom odboru dostavljena tabela sa popisanim službenicima koji ispunjavaju uslove za prestanak radnog odnosa u 2018. godini u kojoj je bilo navedeno da pojedini policijski službenici ispunjavaju uslove za odlazak u penziju u aprilu, maju i tokom 2018. godine. Kada su članovi Nezavisnog odbora u junu mjesecu 2018. godine postavili pitanje Policijskom komesaru da li je za te policijske službenike zatražen listing i da li je gotovo rješenje o prestanku radnog odnosa Policijski komesar je odgovorio da se čeka novi zakon. Dakle, ni u junu nije zatražen listing za policijske službenike koji su u aprilu trebali ići u penziju. Postavlja se pitanje šta da novi zakon, odnosno njegove izmjene nisu stupile na snagu. Da li bi se za te policijske službenike izdala rješenja o prestanku radnog odnosa? Naravno da bi jer bi se tada primjenio stari zakon. Tko će odgovarati što su ti ljudi primali plaću i ostale beneficije za navedeni period kada su već bili ispunjeni uslovi za prestanak radnog odnosa po osnovu ispunjavanja 40 godina penzionog staža. Čorbo je izjavio i to da on smatra da je Policijski komesar zloupotrijebio svoj položaj i ovlasti jer je odbio da primjeni postojeći Zakon o policijskim službenicima a što je bio dužan uraditi jer njegov posao nije da određuje ko ispunjava uslove za penziju ili ne, te na taj način potpuno svjesno i potpuno nezakonito omogućio da policijski službenici koji su trebali ići u penziju ostanu u Upravi policije još godinama i da steknu pravo na penziju pod znatno povoljnijim uslovima, a čime je potpuno svjesno oštećen budžet Kantona Sarajevo. Da nije postojala namjera da tim ljudima prestane radni odnos u skladu sa zakonom govori i činjenica da se Uprava policije nije obratila PIO/MIO kako je to uobičajene par mjeseci prije isteka 40 godina staža osiguranja. U nekoliko konkretnih slučajeva Uprava se za navedene informacije obratila PIO/MIO tek naknadno i to nakon pritiska Nezavisnog odbora. Ovdje je također istakao da Nezavisni odbor nije tražio listinge za policijske službenike već je listinge Policijski komesar dostavio kao prilog uz informaciju za Nezavisni odbor. Također je naglasio da Nezavisni odbor nije tražio uvjerenja o ocjenama za policijske službenike već je tražio određene informacije, iako Nezavisni odbor u skladu sa Zakonom o unutrašnjim poslovima ima pravo pristupa podacima u skladu sa Zakonom o zaštiti ličnih podataka i Zakonom o tajnim podacima. Policijski komesar je dodao da je on prosljedio podatke (listinge) koje mu je dostavila kadrovska služba Uprave policije. U tom smislu, član Nezavisnog odbora Samir Čorbo je postavio pitanje Policijskom komesaru da li je pokrenut postupak da se utvrdi odgovornost policijskih službenika odnosno osoba koji su dostavili podatke a znali su ili su morali znati da se isti ne smiju dostavljati u skladu sa Zakonom o zaštiti ličnih podataka. Također je postavio pitanje Policijskom komesaru kako je Vahid Ćosić i ostali policijski službenici saznali da su korišteni njihovi podaci i u vezi sa istim podnijeli prigovor Agenciji za zaštitu ličnih podataka u BiH? Policijski komesar je odgovorio da kada dobije neki zahtjev onda se taj isti zahtjev proslijeđuje rukovodiocima svih organizacionih jedinica Uprave policije, a Vahid Ćosić je jedan od rukovodilaca. Član Nezavisnog odbora je na tu konstataciju postavio pitanje Policijskom komesaru zašto se onda načelnik Policijske uprave Vahid Ćosić po zaprimljenom zahtjevu nije odmah očitovao? u smislu da je istakao odmah po zaprimljenom zahtjevu da isti nije u skladu sa Zakonom o zaštiti ličnih podataka već je naknadno dostavio prigovor Agenciji. Policijski

komesar je odgovorio da to treba pitati G-dina Vahida Ćosića i da i on mora poslati izjašnjenje Agenciji. Dakle svjesno je dopustio da se prekrši zakon? Član Nezavisnog odbora Samir Ćorbo je istakao da to nije u redu u organizacionom smislu. Komesar je odgovorio da je on odgovoran zašto se to dostavilo i da ne može nikoga drugoga kriviti u Upravi policije. Zašto Vahid nije odmah prema njemu reagovao ne zna i to bi trebali pitati Vahida Ćosića.

Pomenuti član Nezavisnog odbora se osvrnuo i na informaciju koju je ranije dostavio Policijski komesar a vezano za oružje koje se od strane policijskih službenika dostavlja/predaje nadležnoj jedinici Uprave policije i u kakvom stanju se isti predaju (neočišćenom, blago rečeno zapuštenom). Policijski komesar je rekao da se ta informacija odnosi na period kada on nije bio u funkciji Policijskog komesara i da sada postoji Pravilnik kojim su definisana ta pitanja. Također je istakao da od kada je on na čelu Uprave policije svaki mjesec se vrši "smotra oružija i prateće opreme" te se dostavljaju izvještaji nadležnim jedinicama.

Predsjedavajuća Nezavisnog odbora Mirela Alihodžić postavila je pitanje Policijskom komesaru vezano za korištenje službenih vozila u privatne svrhe i ranije doneseni Pravilnik u smislu da li se prati provedba navedenog Pravilnika i na koji način. Policijski komesar je odgovorio da koliko je njemu poznato nema upotrebe službenih vozila u privatne svrhe, sve jedinice u skladu sa Pravilnikom redovno podnose mjesečne izvještaje. Također je istakao da nadzor nad korištenjem voznog parka vrše načelnici policijskih uprava te da je utvrđena primjetno manja potrošnja goriva po pojedinom službenom vozilu.

Na navedeno pitanje nadovezo se član Nezavisnog odbora Samir Ćorbo koji je rekao da je prije otprilike mjesec i pol dana primjetio na području Tjentišta policijsko vozilo sa rotacijom. Radilo se o vozilu marke golf 5 i u pitanju je bio policijski službenik Imamović čiji je brat također došao sa službenim vozilom vatrogasne jedinice. Policijski komesar je naveo da je prema njegovim saznanjima golf 5 prodat 2011/2012 godine i da isti nikada nije prefarban. Misli da se radi o policijskom službeniku Imamoviću iz Novog Sarajeva te mogućnost da mu je neko dozvolio korištenje službenog vozila u privatne svrhe, po njemu nije moguće.

Član Nezavisnog odbora Miroslav Kružik postavio je pitanje kako su protekli izbori u sigurnosnom smislu? Policijski komesar je odgovorio da je sve proteklo u najboljem redu i da nije bilo problema.

Član Nezavisnog odbora Branimir Orašanić se osvrnuo na protekle parlamentarne izbore i istakao da je situacija u društvu generalno zategnuta te je mnogo ljudi koji iz bilo kog razloga mogu napraviti neke ekcese a do toga nije došlo za šta su djelimično zaslužni i pripadnici Uprave policije.

Član Nezavisnog odbora Admir Katica u pogledu dostavljnog tromjesečnog izvještaja o radu Policijskog komesara je pohvalio činjenicu da se svakog mjeseca održavaju stručni kolegij, te redovni "policijski" kolegij svih načelnika PU sa Komesarom jednom sedmično. Smatra da je navedeno nedostajalo u radu ranijeg Policijskog komesara. Postavio je pitanje Policijskom komesaru vezano za uspostavu sigurnosnog područja i prostorije za rad sa maloljetnicima. Policijski komesar je odgovorio da je uspostavljeno sigurnosno područje a u vezi sa prostorijom za rad sa maloljetnicima nabavljena je sva potrebna oprema samo još uvijek prostorija nije obezbjeđena. Raspisan je konkurs za prijem psihologa koji je u toku. Navedeni član Nezavisnog odbora postavio je pitanje Policijskom komesaru vezano za vanredni kontinuirani pregled naveden u tromjesečnom izvještaju a Policijski komesar je odgovorio da se vanredni kontrolni pregled u skladu sa depešom vrši do 5.-og u mjesecu da bi se vidjelo da li su jedinice realizovale ranije naložene mjere. Član Nezavisnog odbora Admir Katica je postavio pitanje Policijskom komesaru da li imaju prioritete utvrđeni od strane Vlade Kantona u pogledu rada Uprave policije. Policijski komesar je odgovorio da se mjesečno informacija o stanju sigurnosti podnosi i Vladi Kantona i kada se ista razmatra na Vladi Kantona utvrđuju se određeni prioritete za rad Uprave policije. Navedeni član Nezavisnog odbora postavio je i pitanje vezano za organizovano tijelo za borbu protiv korupcije na koji način isto djeluje, da li samo po prijavama ili po svojim operativnim saznanjima. Policijski komesar je dogovorio da se na čelu tog tijela nalazi rukovodilac Odjela za privredni kriminal i kada se pojavi koruptivno djelo po prijavi se uključuje to tijelo. Ovaj rukovodilac je ujedno i član tima za borbu protiv korupcije na nivou Kantona. Dakle isti rade samo po saznanju a prijava za korupciju se može direktno dostaviti njima ili se predati u bilo kojoj Policijskoj upravi. Član Nezavisnog odbora Admir Katica je istakao da kod nas generalno vrijedi mišljenje da pojedinac ništa ne može promijeniti i tu aktivnost treba proaktivno osnažiti u smislu borbe protiv korumpiranih policijskih službenika putem e-maila za prijavu, telefonske linije ili sandučića po policijskim upravama.

AD-2

Povodom zahtjeva za očitanjem Agencije za zaštitu ličnih podataka Nezavisni odbor je sačinio odgovor koji će biti dostavljen Agenciji.

AD-3

U okviru ove tačke dnevnog reda nije bilo nerealizovanih zaključaka Nezavisnog odbora.

AD-4

U okviru ove tačke razmatran je zahtjev Pravobranilaštva Kantona Sarajevo za dostavljanjem izjašnjenja/dokaza u postupku po tužbi bivšeg komesara Vahida Ćosića. Zaključeno je da će se u dostavljenom roku Pravobranilaštvu Kantona Sarajevo dostaviti traženo izjašnjenje i dokazi.

Sjednica je završena u 18.50 sati.

PREDSJEDNICA
Mirela Alihodžić
Mirela Alihodžić



ZAPISNIK

sa Devete sjednice Nezavisnog odbora, održane 20.11.2018. godine sa početkom rada u 17:00 sati.

Prisutni članovi: Samir Ćorbo, Mirela Alihodžić, Sanela Brković, Admir Katica, Miroslav Kružik, Jusuf Zornić i Branimir Orašanin.

Sjednici su prisustvovali: Ispred OHR-a: Senad Zlatar i Diana Šatara

Sjednici je prisustvovao: Policijski komesar Mevludin Halilović

Dnevni red

- Usvajanje zapisnika sa Osme sjednice Nezavisnog odbora

1. Informacija o stanju kriminaliteta, javnog reda i mira i saobraćaja na području Kantona Sarajevo za mjesec oktobar/listopad 2018. godine;
2. Odgovor na zahtjev Muriza Memića;
3. Odgovor Odboru za žalbe javnosti ;
4. Realizacija zaključaka Nezavisnog odbora;
5. Razno.

Predloženi dnevni red je jednoglasno usvojen.

Zapisnik sa Osme sjednice je jednoglasno usvojen.

AD-1

Uvodne napomene o stanju kriminaliteta, javnog reda i mira i saobraćaja na području Kantona Sarajevo za mjesec oktobar 2018. godine podnio je Policijski komesar Mevludin Halilović. U mjesecu oktobru 2018. godine, na području Kantona Sarajevo registrovana su 394 krivična djela što je za četiri ili 1% manje u odnosu na isti mjesec prethodne godine. Od ukupnog broja registrovanih krivičnih djela, 203 izvršeno je od strane poznatih, a 191 od strane nepoznatih izvršilaca. Službenici Uprave policije MUP-a KS su u mjesecu oktobru 2018. godine za ukupno 266 krivičnih djela identifikovali osumnjičene izvršioce, što je za 7,4% više u odnosu na isti mjesec prethodne godine. U ovom periodu registrovano je 220 krivičnih djela protiv imovine, što je za 35 djela manje u odnosu na isti mjesec prošle godine. Među djelima iz ove oblasti najbrojnije su: teške krađe – 121-no djelo, zatim krađe – 36, razbojništvo – 20, .. itd.

Na području Kantona Sarajevo u mjesecu oktobru ove godine izvršeno je 35 krivičnih djela teških krađa motornih vozila od čega je osam pronađeno i vraćeno vlasnicima. Zbog postojanja osnova sumnje da su učestvovali u otuđenju motornog vozila nadležnom tužilaštvu u mjesecu oktobru 2018. godine podneseni su službeni izvještaji protiv sedam lica, od kojih su četiri povratnika u činjenju krivičnih djela.

Policijski službenici su u mjesecu oktobru ove godine zbog narušavanja javnog reda i mira preduzeli ukupno 391 prekršajnu sankciju protiv 417 lica. Prema strukturi prekršaja, najzastupljeniji



su prekršaji koji su učinjeni prosjačenjem 165 od ukupnog broja, naročito drskim ponašanjem 43 odbijanjem naređenja i omalovažavanjem policijskih službenika 38 ..

Na području Kantona Sarajevo u mjesecu oktobru 2018. godine u odnosu na isti mjesec prethodne godine smanjen je ukupan broj saobraćajnih nezgoda, broj nezgoda sa materijalnom štetom i nastradalim licima i broj nastradalih lica.

Član Nezavisnog odbora, G-din Čorbo Samir je postavio pitanje Policijskom komesaru da li se broj teških krađa m/v smanjio u periodu nakon ubistava dva policijska službenika.

Policijski komesar je rekao da je značajno smanjen broj krađa m/v nakon tog perioda ali su prošle sedmice ukradena dva m/v, uglavnom su to kadeti i golfovi 2. Na pitanje predsjedavajuće Nezavisnog odbora, G-đe Mirele Alihodžić, da ukoliko je moguće Policijski komesar podijeli sa članovima Nezavisnog odbora informacije koje može podijeliti, a vezano za otkrivanje počionica krivičnog djela ubistva dva policijska službenika, Policijski komesar je odgovorio da od početka uviđajem rukovodi Kantonalno tužilaštvo, odnosno 2+2 tužioca (prva tri dana). Pomoć je od početka pružao FMUP odnosno njihova forenzika obzirom da je Uprava policije u ovom slučaju oštećena strana. Uspjeli su pronaći nekoliko DNK profila te se došlo do saznanja o kojoj vrsti oružja je riječ. Izuzet je vido nadzor (kamere) a FBI kancelarija je pružila neophodnu pomoć za čišćenje snimaka video nadzora. U subotu je dolazio stručnjak iz Slovenije (antropolog) koji bi također mogao pružiti stručnu pomoć. Uzete su izjave, zamjenica Kantonalne tužiteljice vodi istragu, uključena je SIPA/FMUP/OSA. Pretraženo je vozilo pronađeno na licu mjesta i sve je rađeno na osnovu informacija koje je davala Uprava policije. U ovom slučaju se postupalo po planu vanrednih okolnosti. Zbog efikasnosti Uprava policije je tražila da istragu preuzme Tužilaštvo BiH. 12.12.2018. godine je zakazan sastanak i Uprava policije, nažalost, ne može imati uticaj na to da li će istragu preuzeti Tužilaštvo BiH. Sve zavisi od dogovora Kantonalnog tužilaštva i Tužilaštva BiH.

Član Nezavisnog odbora, G-din Branimir Orašanin je postavio pitanje Policijskom komesaru da li smatra da će ova situacija u kojoj su stradala dva policijska službenika na neki način unaprijediti saradnju Uprave policije sa MUP-om RS-a, SIPA-om i svim ostalim policijskim agencijama. Da li će se građani konačno osjećati sigurno po pitanju automafije? Da li Policijski komesar misli da će se nešto pozitivno desiti?

Policijski komesar je odgovorio da je pomenuti događaj ujedinio policijske agencije ali se uglavnom radilo o fizičkoj potpori. 20 godina ne funkcionise saradnja između MUP-a KS i MUP-a RS. Jedino rješenje po njemu je da krivična djela teške krađe m/v preuzme Tužilaštvo BiH koje će direktno izdavati naredbe SIPA-i. Kada se određene stvari spomenu kolegama iz RS-a, isti ne žele saradivati sa SIPA-om. Nije ništa bolja situacija ni u kantonima sa hrvatskim predznakom. Na teritoriju RS-a se ne može otići po određenu informaciju ili podatak, čak smo dobili i protestno pismo MUP-a RS jer se neki policijski službenik predstavio kao federalna policija. Na nekom nivou postoje određeni kontakti i saradnja, ali vidite da se sad izmišljaju priče da su privedena lica sa teritorije RS-a pretučena na području Kantona Sarajevo. Sve se nažalost povezuje sa nacionalnim predznakom. Tek smo dobili naredbu da se izvrši pretres mobitela pronađenih u vozilu.

Član Nezavisnog odbora, G-din Čorbo Samir je postavio pitanje Policijskom komesaru kakav je slučaj kad je obrnuta situacija? Kada je MUP-u RS potrebna asistencija (pomoć) Uprave policije Kantona Sarajevo?

Policijski komesar je odgovorio da je u ovom pomenutom slučaju naredba glasila na Upravu policije a RS je pružao asistenciju. Smatra da se policija RS-a boji tih lica koji učestvuju u teškim krađama m/v.

Član Nezavisnog odbora, G-din Čorbo Samir je postavio pitanje da li se policija RS-a boji tih lica ili su sa njima u sprezi?

Policijski komesar je odgovorio da je sve moguće. Sada je u medijima objavljeno da su ta lica iz RS pretučena u Sarajevu što je nemoguće jer su u kancelariji gdje su isti privedeni bila četiri kantonalna tužioca, te da su fotografije koje su plasirane u medijima lažne odnosno da se radi o fotografijama sukoba navijača iz Srbije i da su iste zlonamjerno podmetnute kako bi se sve svelo na međunacionalne okvire odnosno kako bi se izvršio pritisak na MUP RS da „svoje ne isporučuje“ u Sarajevo da ih tamo tuku. Međutim to nije prošlo jer on kao komesar ima personalno dobre

odnose sa načelnicima i visokim oficirima MUP RS-a, te da se uglavno ovakve stvari rješavaju na personalnoj osnovi (pomaže se na zamolbu kao kolega-kolegi).

Član Nezavisnog odbora, G-din Čorbo Samir je postavio pitanje Policijskom komesaru da li je Uprava policije objavila demant u vezi pomenutog premlaživana?

Policijski komesar je odgovorio da nisu jer oni sada ispadaju žrtve a Uprava policije posjeduje svu relevantnu dokumentaciju.

Član Nezavisnog odbora G-din Miroslav Kružik postavio je pitanje Policijskom komesaru da li u Upravi policije ima neraspoređenih policijskih službenika.

Policijski komesar je odgovorio da broj neraspoređenih policijskih službenika je veoma mali i radi se o 3 službenika, međutim i oni će biti raspoređeni prema sistematizaciji.

Član Nezavisnog odbora G-din Admir Katica je postavio pitanje da li postoje kamere odnosno video nadzor koji može snimati lica? Policijski komesar je odgovorio da postoje. Bila je testna faza i sad je u primjeni.

Član Nezavisnog odbora Miroslav Kružik postavio je pitanje Policijskom komesaru da je kada se desilo ubistvo policajaca na jednoj od televizijskih stanica primjetio da je izjavu dala Azra Kurić koja se predstavila kao rukovodilac smjene iako ista nema čin mlađeg inspektora.

Policijski komesar je odgovorio da ona našla na tom mjestu kada je tražena izjava ali ona svakako nije rukovodilac smjene.

Član Nezavisnog odbora G-din Admir Katica se osvrnuo na događaj ubistva policijskih službenika o kojem se diskutiralo na sjednici i istakao je da je FMUP i MUP RS-a trebao iznaći rješenje u smislu smanjenja birokracije i da se postigne saradnja. Taj momenat se nažalost nije iskoristio. Također se osvrnuo na web stranicu MUP KS a prije svega na on line prijavu korupcije te je iznio nekoliko primjedbi u smislu da je sistem za prijavu korupcije diskriminatorski jer se korisnik mora registrovati. Obični građanin nikada neće pristati na to da se registruje te je istako da se o samoj mogućnosti on line prijave korupcije trebaju obavijestiti i mediji u neko dogledno vrijeme.

Član Nezavisnog odbora Miroslav Kružik postavio je pitanje Policijskom komesaru da li još uvijek ima privremeno raspoređenih policijskih službenika?

Policijski komesar je odgovorio da ima, u činu samostalnog inspektora, jedan ili dva viša inspektora, jedan i dva pomoćnika, kao i jedan glavni inspektor.

Nezavisni odbor je primio k znanju Informaciju o stanju kriminaliteta, javnog reda i mira i saobraćaja na području Kantona Sarajevo za mjesec oktobar/listopad 2018. godine.

AD-2

Nezavisni odbor je jednoglasno prihvatio odgovor koji će biti upućen G-dinu Murizu Memiću.

AD-3

Povodom zahtjeva za očitanjem Odbora za žalbe javnosti, Nezavisni odbor je sačinio odgovor koji će biti dostavljen Odboru.

AD-4

U okviru ove tačke dnevnog reda nije bilo nerealizovanih zaključaka Nezavisnog odbora.

AD-4

U okviru ove tačke nije bilo prijavljenih diskutanata.

Sjednica je završena u 17.50 sati.

PREDSJEDNICA
Mirela Alihodžić
Mirela Alihodžić



ZAPISNIK

sa Desete sjednice Nezavisnog odbora, održane 18.12.2018. godine sa početkom rada u 17:00 sati.

Prisutni članovi: Samir Čorbo, Mirela Alihodžić, Sanela Brković, Admir Katica, Miroslav Kružik, Jusuf Zornić i Branimir Orašanin.

Sjednici je prisustvovao: Ispred OHR-a: Senad Zlatar

Sjednici je prisustvovao: Policijski komesar Mevludin Halilović

Dnevni red

- Usvajanje zapisnika sa Devete sjednice Nezavisnog odbora
- 1. Informacija o stanju kriminaliteta, javnog reda i mira i saobraćaja na području Kantona Sarajevo za mjesec novembar/studen 2018. godine;
- 2. Razmatranje Rješenja Agencije za zaštitu ličnih/osobnih podataka u Bosni i Hercegovini;
- 3. Razmatranje žalbi na rad Policijskog komesara;;
- 4. Realizacija zaključaka Nezavisnog odbora;
- 5. Razno.

Predloženi dnevni red je jednoglasno usvojen

Zapisnik sa Devete sjednice je jednoglasno usvojen.

AD-1

Uvodne napomene o stanju kriminaliteta, javnog reda i mira i saobraćaja na području Kantona Sarajevo za mjesec novembar 2018. godine podnio je Policijski komesar Mevludin Halilović.

U mjesecu novembru 2018. godine, na području Kantona Sarajevo registrovana su 343 krivična djela što je za 98 manje u odnosu na isti mjesec prethodne godine. Od ukupnog broja registrovanih krivičnih djela, 196 izvršeno je od strane poznatih, a 147 od strane nepoznatih izvršilaca.

U mjesecu novembaru 2018. godine u odnosu na isti mjesec prethodne godine, zabilježeno je značajno smanjenje broja registrovanih krivičnih djela i to za 98. Najznačajnije smanjenje je zabilježeno u oblasti protiv imovine, sigurnosti javnog prometa, javnog reda i pravnog prometa, zdravlja ljudi, itd...U ovom mjesecu, registrovano je 181-no krivično djelo protiv imovine, što je za 31,7% manje u odnosu na isti mjesec prošle godine. Među djelima iz ove oblasti najbrojnije su: teške krađe – 102 djela, zatim krađe – 26, razbojništvo – 19, oštećenje tuđe stvari – 16 itd.



Za ukupno 93 djela identifikovan je osumnjičeni izvršilac što je za 10,6% veća rasvijetljenost imovinskih delikata u odnosu isti mjesec prethodne godine. Na području Kantona Sarajevo u mjesecu novembru ove godine izvršeno je osam krivičnih djela teških krađa motornih vozila što u odnosu na uporedni mjesec, predstavlja značajno smanjenje od 72,4%. Tokom izvještajnog mjeseca pronađeno je i vraćeno 12 motornih vozila (sedam vozila je otuđeno u ranijem periodu). Od strane Uprave policije MUP-a KS vraćeno je pet vozila, MUP-a RS-a - šest i vlasnici su pronašli – jedno vozilo).

Na području Kantona Sarajevo u mjesecu novembru 2018. godine u odnosu na isti mjesec prethodne godine smanjen je ukupan broj saobraćajnih nezgoda, broj nezgoda sa materijalnom štetom, sa nastradalim licima i brojem povrijeđenih lica, dok je broj poginulih lica povećan. Registrovane su 634 saobraćajne nezgode, od čega je 585 sa materijalnom štetom i 49 sa nastradalim licima. U navedenim nezgodama dva lica su poginula.

Otvarajući raspravu o ovoj tački dnevnog reda predsjedavajuća Mirela Alihodžić je postavila pitanje Policijskom komesaru a isto se odnosi na problematiku neusklađenosti postojećeg Pravilnika o posebnim uniformama policijskih službenika Uprave policije Kantona Sarajevo sa Uredbom o jedinstvenoj policijskoj uniformi FBiH a o čemu je ranije Policijski komesar dostavio informaciju (na više od 200 strana i koja je uglavnom sadržavala izjašnjenja pojedinih Sektora Uprave policije), da li su u međuvremenu pokrenute aktivnosti kako bi se riješila navedena problematika. Iz informacije koja je dostavljena Nezavisnom odboru vidljivo je da je Policijski komesar formirao Radnu grupu koja je također ustanovila da navedeni Pravilnik nije u skladu sa Uredbom. Ista je naglasila da je Nezavisnom odboru jasno da navedeni Pravilnik donosi ministar unutrašnjih poslova, ali da li je istom poslan neki dopis, da li je održan neki sastanak na ovu temu i sl.

Policijski komesar je odgovarajući na postavljeno pitanje ponovio da Pravilnik o posebnim uniformama policijskih službenika Uprave policije Kantona Sarajevo donosi ministar MUP-a, te da mu je upućen dopis oko ovoga pitanja, međutim do danas nije dostavljen odgovor od strane ministra. Dopis je davno poslan i na isti nije upućena urgencija. Također, sastanak po ovom pitanju nije iniciran.

Član Nezavisnog odbora Miroslav Kružik se osvrnuo na izradu Akcionog plana Vlade KS i lokalnih zajednica u povodu krađe motornih vozila u Kantonu Sarajevo te postavio pitanje Policijskom komesaru u vezi sa detaljima istog.

Policijski komesar je istakao da je Radna grupa MUP-a Kantona Sarajevo izvršila analizu video nadzora i drugih sistema te sačinila akcioni plan za postupanje u smislu koordinacije nadležnih institucija, unaprjeđenje saradnje te obavještenje vlasnika. Formirano je posebno odjeljenje koje će se baviti krađama m/v u Kantonu Sarajevo. Policijski komesar je napomenuo da je u periodu od 2003.-2018. godine u Kantonu Sarajevo ukradeno preko 12000 motornih vozila. Za realizaciju ovoga plana do 2020. godine, potrebno je oko 8.000.000 KM. Potrebno je pokriti video nadzorom sve izlaze iz Kantona Sarajevo, osavremeniti komunikacioni sistem i stvoriti pretpostavke da sve ovo funkcioniše. U tom smislu je potrebno ostvariti saradnju sa MUP-om RS-a, uspostaviti privremeni komunikacijski operativni centar. Najvažnije je da je Vlada usvojila plan. Pokušat će se dobiti podrška od lokalnih zajednica u smislu njihovog uključivanja u finansijskom pogledu.

Član Nezavisnog odbora Jusuf Zornić se osvrnuo na dio informacije koja se odnosi na oblast javnog reda i mira u kojem se koristi termin (izraz) prekršajna sankcija, te postavio pitanje da li se navedeni termin odnosi i na broj zahtjeva za pokretanje prekršajnog postupka.

Policijski komesar je odgovorio da je i nalog jedna vrsta zahtjeva.

Član Nezavisnog odbora Jusuf Zornić je dodao da mu terminološki to nije usklađeno jer kad se pošalje zahtjev onda sud može eventualno izreći sankcije, jer postoje situacije kada prekršilac može biti oslobođen, ne znači svaki podneseni zahtjev da će neko biti i kažnjen. Isti je naglasio da je istog mišljenja kada su u pitanju i krivična djela gdje se također treba govoriti o broju izvještaja koji su podneseni tužilaštvu, zbog statistike.

Član Nezavisnog odbora Samir Čorbo je postavio pitanje Policijskom komesaru u vezi sa događajem o kojem se pisalo u medijima i to da je na području Semizovca sletio helikopter Vlade RS u kojem se nalazio predsjedavajući Predsjedništva BiH G-din Milorad Dodik. Postavio je pitanje

da li MUP Kantona Sarajevo ima nadležnosti praćenja i obezbjeđivanja visokih dužnosnika Bosne i Hercegovine, te da li je o istom obavijestio direktora Direkcije za koordinaciju policijskih tijela.

Policijski komesar je odgovorio da MUP Kantona Sarajevo u okviru svojih nadležnosti može samo propratiti visoko pozicionirane osobe tako što će obezbjeđivati saobraćajnice, raskrsnice. U ovom konkretnom slučaju ga je kontaktirao kolega iz operativnog centra MUP-a RS-a (oko 1 ili 2 sata) i informirao ga da je helikopter sletio u Semizovac i da se u istom nalazi predsjedavajući Predsjedništva BiH G-din Milorad Dodik. Istakao je da je poslao dvije patrole da bi spriječio eventualne incidente i patrola saobraćajne policije je istog samo propratila do Istočnog Sarajeva. Istakao je da je bilo još nekoliko zahtjeva za isto postupanje ali su odbijeni i rečeno im je da se obrate Direkciji za koordinaciju policijskih tijela. U ovom slučaju Direkcija nije obavještena jer ovo nije prvi put da se propraćaju dužnosnici, do sada su propraćane razne sudije, tužioc, glumci i sl.

Član Nezavisnog odbora Samir Čorbo je istakao da je predsjedavajuća na 8. sjednici održanoj 16.10.2018.godine postavila pitanje Policijskom komesaru vezano za nadzor nad primjenom Depeše (ili Instrukcije) o korištenju službenih motornih vozila. Tada je Policijski komesar odgovorio da se svakodnevno podnose izvještaji od strane načelnika policijskih uprava i da nema slučajeva zloupotrebe koliko je njemu poznato. Član Nezavisnog odbora Samir Čorbo je podsjetio da je tada Policijskom komesaru ukazao na događaj koji se desio na lokalitetu Tjentišta kada je policijski službenik Imamović boravio sa službenim vozilom na pomenutom lokalitetu. Nezavisnom odboru je dostavljena informacija u kojoj se navodi da su sve činjenice tačne u vezi navedenog policijskog službenika (da je isti u navedenom vremenskom periodu boravio na navedenom lokalitetu, daje bio u društvu svoga brata), ali se jedino ne slaže činjenica da je koristio službeno vozilo. Isti je naglasio da je čak navedeni policijski službenik telefonski kontaktiran i da je odgovorio da on nije koristio službeno vozilo i da je to dovoljno. Da li se nešto konkretno poduzelo da se ustanovi da li je bilo neovlaštenog korištenja službenih vozila u privatne svrhe? Prema saznanjima Nezavisnog odbora policijski službenik Irfan Nefić koristi službeno vozilo u privatne svrhe na lokalitetu Breze a policijski službenik Vahid Čosić na lokalitetu Jablanice.

Policijski komesar je istakao da je nakon izvršenih provjera utvrđeno da jedno od tih vozila (Golf 5) bilo službeno vozilo MUP-a Kantona Sarajevo te je licitacijom prodato tom licu (Imamoviću) koje nije skinulo vanjske naljepnice. Također je naglasio da misli da je navedeni predmet prosljeđen unutrašnjoj kontroli. Šef smjene je morao dati odobrenje za korištenje službenog vozila.

Član Nezavisnog odbora Samir Čorbo je dodao da je samo želio da istakne da se ta depeša očigledno nepoštuje i da je ona izgleda u svrhu da se nekome zamažu oči u smislu da formalno kao postoji mjera, te smatra da se trebaju poduzeti odgovarajuće mjere i radnje. Jer po saznanju Nezavisnog odbora ovu depešu ne poštuju visoko rangirani službenici – između ostalih i Irfan Nefić koji službeno vozilo koristi kao privatno i odlazi sa istim u Brezu gdje stanuje.

Član Nezavisnog odbora Miroslav Kružik je postavio pitanje koje se odnosi na teške krađe na području opštine Vogošća u smislu mogućnosti veće angažiranosti policije na navedenom lokalitetu te da li može postojati neka kontinuiranost u radu. Također je postavio pitanje da li je sačinjen operativni plan u vezi ovih slučajeva kako se ne bismo uvijek bavili posljedicama. Policijski komesar je odgovorio da PU Vogošća radi na zaštiti lične imovine stanovnika Vogošće te da nije zabilježen veći porast kriminala u opštini Vogošća u odnosu na ostale opštine. Također je naglasio da se na kraju dođe do izvršilaca.

Predsjedavajuća Nezavisnog odbora Mirela Alihodžić postavila je pitanje Policijskom komesaru u vezi istrage ubistva dvojice policajaca, da li je održan sastanak sa državnim tužilaštvom obzirom da je Policijski komesar na prethodnoj sjednici istakao kako se treba održati sastanak i da bi najbolje bilo da Tužilaštvo BiH preuzme slučaj.

Član Nezavisnog odbora Miroslav Kružik je istakao da je sam Policijski komesar kada se dogodila navedena tragedija izjavio da je sigurnosna situacija u Kantonu Sarajevo narušena. Policijski komesar je odgovorio da u toj situaciji nije ništa drugo ni mogao reći osim da je sigurnosna situacija u Kantonu Sarajevo narušena. U navedenom predmetu identifikovano je gdje se nalazi problem. Provodi se akcija za oko 20 lica sa područja RS-a. Ima elemenata

organizovanog kriminala i to je nadležnost državnog tužilaštva i suda. Do sastanka je došlo ali državno tužilaštvo još nije preuzelo slučaj.

Predsjedavajuća Nezavisnog odbora Mirela Alihodžić postavila je pitanje Policijskom komesaru u vezi sa činjenicom da nekoliko policijskih službenika nije prošlo sigurnosne provjere, da li je istina da će isti ostati bez posla i da li postoji mogućnost njihove preraspodjele na neka druga radna mjesta.

Policijski komesar je odgovorio da u vezi sa sigurnosnim smetnjama OSA donosi rješenje i Uprava policije postupa po njima. Policijski službenici koji nisu prošli sigurnosne provjere su proglašeni prekobrojnim, ostvariće pravo na naknadu ali ostaju bez posla jer za gotovo sva radna mjesta potrebno je proći sigurnosnu provjeru. Čak je naglasio i da je Nezavisni odbor tražio da se sigurnosne provjere vrate obzirom da su iste bile ukinute u vrijeme bivšeg komesara Vahida Čosića.

Predsjedavajuća Nezavisnog odbora Mirela Alihodžić postavila je pitanje Policijskom komesaru u vezi sa primjenom Zakona o policijskim službenicima u pogledu donošenja rješenja o prestanku radnog odnosa zbog ispunjavanje uslova za odlazak u penziju. Obzirom da je ranije Policijski komesar naglašavao da se rješenja ne mogu donositi sve dok se zakon ne promijeni, obzirom da je zakon promijenjen da li se otpočelo sa njegovom primjenom.

Policijski komesar je odgovorio da nije obzirom da nijedna institucija neće da dadne tumačenje koji organ je dužan uplatiti ratni staž i kako to premostiti.

Predsjedavajuća Nezavisnog odbora Mirela Alihodžić je dodala da je nevjerovatno da je problem postojao i da se pravdalo da će se riješiti izmjenama i dopunama zakona a sada kada je isti izmjenjen i dopunjen problem i dalje postoji.

Nezavisni odbor je primio k znanju Informaciju o stanju kriminaliteta, javnog reda i mira i saobraćaja na području Kantona Sarajevo za mjesec novembar/studeni 2018. godine.

AD-2

Član Nezavisnog odbora Branimir Orašanin je istakao da postoji realna mogućnost da u slučaju tužbe Nezavisnog odbora protiv Rješenja Agencije za zaštitu ličnih/osobnih podataka u Bosni i Hercegovini predmet zaduži kao sudija Suda BiH te je tražio da se izuzme u vezi sa raspravom i odlučivanjem po ovoj tački dnevnog reda.

Zbog situacije koja je nastala donošenjem Rješenja od strane Agencije za zaštitu ličnih podataka Nezavisni odbor smatra da ovim rješenjem onemogućen rad Nezavisnog odbora. Usvojen je zaključak da će se uputiti zahtjev Skupštini Kantona Sarajevo (Zakonodavno-pravnoj komisiji) da da autentično tumačenje člana 47. Zakona o unutrašnjim poslovima Kantona Sarajevo.

Također, usvojen je zaključak da se kontaktira Pravobranilaštvo Kantona Sarajevo (u smislu mogućnosti podnošenja tužbe od strane navedene institucije i zastupanja) i pokrene upravni spor.

AD-3

U okviru ove tačke dnevnog reda Nezavisni odbor je razmatrao dostavljene žalbe na rad Policijskog komesara. Navedene žalbe bit će prosljeđene nadležnim institucijama (Kantonalnom tužilaštvu) a iste će sačiniti član Nezavisnog odbora Sanela Brković.

AD-4

U okviru ove tačke dnevnog reda nije bilo nerealizovanih zaključaka Nezavisnog odbora.

AD-5

U okviru ove tačke nije bilo prijavljenih diskutanata.

Dogovoren je okvirni termin za narednu sjednicu, i to 10. januar 2019. godine.

Sjednica je završena u 18.50 sati.

PREDSJEDNICA

Mirela Alihodžić

Mirela Alihodžić



ZAPISNIK

sa 11. sjednice Nezavisnog odbora, održane 29.01.2019. godine sa početkom rada u 16:30 sati.

Prisutni članovi: Samir Čorbo, Mirela Alihodžić, Sanela Brković, Branimir Orašanin i Jusuf Zornić.
Opravdano odsutan: Miroslav Kružik.
Odsutan: G-din Admir Katica.

DNEVNI RED

1. Ocjena rada Policijskog komesara za 2018. godinu
2. Izbor predsjednika i zamjenika Nezavisnog odbora;
3. Razno.

Prije prelaska na dnevni red, član Nezavisnog odbora G-din Branimir Orašanin obavjestio je ostale članove Nezavisnog odbora da je njegova funkcija u Nezavisnom odboru na neki način "zamrznuta" do donošenja odluke Visokog sudskog i tužilačkog vijeća u vezi donesenog etičkog kodeksa i mogućnosti da isti bude član policijskih odbora. S tim u vezi isti do daljnjeg neće učestvovati u radu Nezavisnog odbora ni u raspravama ni u odlučivanju po tačkama dnevnog reda.

Predloženi dnevni red je jednoglasno usvojen.

AD-1

Zbog nedostatka kvoruma za odlučivanje (pet članova Nezavisnog odbora) po ovoj tački dnevnog reda, Nezavisni odbor nije razmatrao istu. Naime, član Nezavisnog odbora G-din Admir Katica je podnio ostavku na mjesto člana Nezavisnog odbora, član Nezavisnog odbora G-din Branimir Orašanin je „zamrznuo“ svoj status do odluke Visokog sudskog i tužilačkog vijeća dok član Nezavisnog odbora Miroslav Kružik zbog bolesti nije mogao prisustvovati sjednici. Obzirom da su na sjednici samo četiri člana Nezavisnog odbora mogla učestvovati u raspravi i donošenju odluke (a potrebno je pet), dogovoreno je da se ova tačka razmatra kada se steknu uslovi (kvorum) za odlučivanje Nezavisnog odbora o istoj.

Povodom ove tačke dnevnog reda održana je PRESS konferencija na kojoj je prisutnim novinarima obrazložena nemogućnost razmatranja ove tačke dnevnog reda.

AD-2

Na osnovu člana 9. stav (1) Poslovnika o radu Nezavisnog odbora, za predsjednika je jednoglasno izabran Miroslav Kružik a funkciju zamjenice će obavljati Sanela Brković za period od šest mjeseci.

Sjednica je završena u 17.00 sati.

PREDSJEDNICA
Mirela Alihodžić
Mirela Alihodžić

